



淨土法要

佛誕生於四千零七十四年（從中華民國三十年計算）在世金口所說阿彌陀經（姚秦時鳩摩羅什譯）從知彌陀決無虛願故此書首列彌陀四十八願及阿彌陀經

永明智覺禪師會同諸說撰宗鏡錄一百卷又撰萬

善同歸集其示參禪念佛四料揀偈曰

一有禪無淨土。十人九蹉路。陰境若現前。瞥爾隨他去。

二無禪有淨土。萬修萬人去。但得見彌陀。何愁不開悟。

三有禪有淨土。猶如戴角虎。現世爲人師。來世作佛祖。

四無禪無淨土。鐵床并銅柱。萬劫與千生。沒個人依怙。

▲▲淨土法要目錄

(一) 阿彌陀佛四十八願

(二) 佛說阿彌陀佛經

(三) 智者大師十疑論

(四) 天如禪師二十二問

(五) 淨土宗十一代祖師列傳

附徹悟禪師語錄

▲▲簡要念佛法門

戒殺生

戒偷盜

戒邪淫

戒妄語

戒綺語

戒兩舌

戒惡口



戒貪欲

戒瞋恚

戒邪見

每月至少持十齋

初一日 十四日 十八日 廿四日 廿九日
初八日 十五日 廿三日 廿八日 卅日

遇小建自廿七日起。

每晨每晚。向西面正合掌。念南無阿彌陀佛。盡一口氣為一念。隨氣長短。不限佛數。如是謂之十氣。

然後接念 南無娑婆世界本師釋迦牟尼佛三聲 南無阿彌陀佛三聲 南

無觀世音菩薩三聲 南無大勢至菩薩三聲 南無清淨大海眾菩薩三聲

▲▲簡要發願及回向文 一遍

衆生無邊誓願度。煩惱無盡誓願斷。法門無量誓願學。佛道無上誓願成。願生西方淨土中。九品蓮花為父母。花開見佛悟無生。不退菩薩為伴侶。

▲▲精進念佛法門

（節錄寶王論）釋迦佛在世時。有翁婆二人。用穀一斗記數。念阿彌陀佛。願生西方。佛云。我別有方法。令汝念佛一聲得多穀之數。乃教以念『南無西方極樂世界。三十六萬億、一十一萬、九千五百、同名同號阿彌陀佛。』（至少念珠一串）

大彌陀咒（每朝晨念二十一遍）

南無辣怛那 怛辣也野 南無阿唎耶 米他拜耶 他太耨他耶 阿囉哈堆
三母耶 三菩提耶 他唎野他 唵 阿木唎推 阿木唎託那怕凡 阿木
唎他三派梅 阿木唎他耨路配 阿木唎他雪堆 阿木唎他推雖 阿木唎他
米可唎他耨米奈 阿木唎他耨耨奈幾路開衣卡來 阿木唎他吐都米蘇買來
煞路拜 阿耶煞他奈 煞路拜 卡路買 過來夏 過夏羊 卡來 娑婆

訶

往生淨土咒（每夜晚念二十一遍）

南無阿彌哆婆野 哆他加多野 哆唎野他 阿彌唎多婆毗 阿彌唎哆 悉
耽婆毘 阿彌利哆 毘迦蘭諦 阿彌利哆 毘迦蘭多 伽彌膩 伽伽那
枳多迦隸娑婆訶

（迴向文） 弟子普爲四恩三有。法界衆生。求於諸佛。一乘無上菩提道故。專心
特念阿彌陀佛萬德洪名。期生淨土。弟子痛念業重福輕。障深慧淺。染心易熾。淨德
難成。今於佛前。翹勤五體。披瀝一心。投誠懺悔。我及衆生。曠劫至今。迷本淨心。縱貪
瞋癡。染穢三業。無量無邊。所積罪垢。無量無邊。從今日始。立深誓願。遠離惡法。誓不
更造。勤修聖道。誓不退惰。誓成正覺。誓度衆生。歷劫冤業。願悉消滅。阿彌陀佛以慈
悲願力。當證知吾。當哀愍吾。當加被吾。願禪觀之中。夢寐之際。得見阿彌陀佛金色
之身。得履阿彌陀佛寶嚴之土。得蒙阿彌陀佛甘露灌頂。光被我身。手摩我頭。衣覆
我體。使我宿障消除。善根增長。頓空煩惱。頓破無明。圓覺妙心。廓然開悟。寂光眞境。

常得現前。迨至臨欲命終。預知時至。身無一切病苦厄難。心無一切貪戀迷惑。諸根悅豫。正念分明。捨報安詳。如入禪定。阿彌陀佛與觀音勢至諸大菩薩。放光接引。垂手提攜。樓閣幢幡。異香天樂。西方勝境。昭示目前。令諸衆生。見者聞者。歡喜感歎。發菩提心。我於爾時。乘金剛臺。隨從佛後。如彈指頃。生極樂國。七寶池內。勝蓮華中。花開見佛。見諸菩薩。聞妙法音。獲無生忍。於須臾間。承事諸佛。親蒙授記。得授記已。三身四智。五眼六通。無量百千陀羅尼門。一切功德。悉地成就。然後不違安養。回入娑婆。分身無數。遍十方刹。以不可思議自在神力。種種方便。度脫衆生。咸令離染。復得淨心。同生西方。入不退地。如是大願。世界無盡。衆生無盡。業及煩惱一切無盡。我願無盡。願今禮佛發願修持功德。回施有情。四恩總報。三有齊資。法界衆生。同圓種智。

(一遍)

阿彌陀佛身金色

相好光明無等倫

白毫宛轉五須彌

紺目澄清四大海

光中化佛無數億 化菩薩衆亦無邊

四十八願度衆生 九品咸令登彼岸（一遍）

願以此功德 莊嚴佛淨土 上報四重恩 下濟三塗苦

若有見聞者 悉發菩提心 盡此一報身 同生極樂國

南無十方三世一切佛。一切菩薩摩訶薩。摩訶般若波羅蜜。以上皆一遍

阿彌陀佛在自在王佛前立四十八願

一願 我作佛時。剎中無地獄餓鬼禽畜。以至蜎飛螻動之類。

二願 剎中無婦女。無央數世界諸天人民。以至蜎飛螻動。來生我剎者。皆於七寶池蓮華中生。

三願 我剎中人。欲飲之時。七寶鉢中。百味飲食。化現在前。食已。器用自然化去。

四願 我剎中人。所欲衣服。隨念卽至。不假裁縫。擣染浣濯。

五願 我剎中。自地以上。皆有宅宇。宮殿樓閣。池流華樹。悉以無量雜寶。百千種香。

而共合成。其香普薰十方世界。衆生聞是香者。皆修佛行。

六願 我剎中人。皆心相愛敬。無相憎嫉。

七願 我剎中人。無淫佚嗔怒愚癡之心。

八願 我剎中人。皆同一善心。無惑他念。其所欲言。皆預相知意。

九願 我刹中人。不聞不善之名。况有其實。

十願 刹中人知身如幻。無貪著心。

十一願 刹中雖有天人。而其形容。皆一類金色。面目端正淨好。

十二願 我作佛時。假令無央數世界諸天人民。盡爲緣覺聲聞。不能知我之年壽。當若干萬億劫。

十三願 假令十方各千億世界諸天人民。皆爲緣覺聲聞。一心共計。亦莫如我刹中。中。天。人。之。數。

十四願 我刹中人民。壽命皆無央劫。莫知其數。

十五願 我刹中人所受快樂。一如漏盡比丘。

十六願 我刹中人。住正信位。離顛倒想。遠離分別。諸根寂靜。所止盡般泥洹。

十七願 我作佛時。說經行道。十倍於諸佛。

十八願 刹中人盡通宿命。知百千億那由他劫事。

十九願 刹中人盡得天眼。見百千億那由他世界。

二十願 刹中人盡得天耳。聞百千億那由他諸佛說法。悉能受持。

二十一願 刹中人得他心智。知百千億那由他世界衆生心念。

二十二願 刹中人盡得神足。於一念頃。能超過百千億那由他世界。

二十三願 我作佛時。名聞十方無數世界。諸佛稱我功德。及國土之勝。諸天人民。

乃至蜎飛蠕動。聞我名號。慈心喜悅者。皆令來生我刹。

二十四願 頂中光明絕妙。勝於日月百千萬倍。

二十五願 我作佛時。光明照無數天下。諸天人民。乃至異類。見我光明。皆慈心作

善。來生我國。

二十六願 衆生蒙我光明。觸其身者。過諸天人。

二十七願 十方諸天人民。有發菩提心。奉持齋戒。行六波羅欲生我刹。我現其前。

引爲不退菩薩。

二十八願 十方世界天人聞我名號。燒香散華。飯食沙門。起立塔寺。齋戒清淨。一心繫念於我。雖止一晝夜不絕。亦必生我刹。

二十九願 十方世界諸天人。至心信樂欲生我刹。十聲念我名號。必遂來生。惟除五逆。誹謗正法。

三十願 十方世界衆生。前世作惡。聞我名號。卽懺悔爲善。奉持經戒。壽終不經三惡道。得生我刹。

三十一願 十方天人。聞我名號。五體投地。喜悅信樂。修菩薩行。常爲諸天世人之所敬。

三十二願 十方無央數世界女人。聞我名號。喜悅信樂。發菩提心。厭惡女身。壽終之後。不復爲女。

三十三願 生我刹菩薩。一生將補佛處。若其本願欲往他方攝化衆生。我以神力。助其修種種行願。

三十四願 刹中人欲生他方者。如其願不墮惡道。

三十五願 刹中菩薩。以香華旛蓋。眞珠瓔珞。種種供具。往無量世界供養諸佛。一

食之頃。即可徧至。

三十六願 刹中菩薩。欲以萬種供具。供養十方無央數佛。供養衆具。自然在前。

三十七願 刹中菩薩。受持經法。必得辯才智慧。

三十八願 刹中菩薩。辯才智慧。不可限量。

三十九願 刹中菩薩。得金剛那羅延力身。皆紫磨金色。具三十二相。八十種好。

四十願 我刹清淨。照見十方無量世界。菩薩欲於寶樹中。見十方一切佛刹。卽時

應現。

四十一願 刹中菩提。雖少功德者。皆知見道場樹。

四十二願 刹中一切萬物。皆嚴淨光麗。形色殊特。雖得天眼。不能辨其名數。

四十三願 刹中欲得闍法。隨其志願。自然得聞。

四十四願 剎中菩薩聲聞。頂中皆有光明。說經行道。無異於佛。

四十五願 他方菩薩。聞我名號。皈依精進。皆得清淨解脫三昧。供養不可思議諸佛。

四十六願 他方菩薩。皈依精進。皆得普等三昧。

四十七願 他方菩薩。皈依精進。即得不退轉地。

四十八願 他方菩薩。聞我名號。皈依精進。即得至第一忍。第二忍。第三忍。於諸佛法。永不退轉。

果能信得阿彌陀佛真。便是我之善根。果能發得菩提心切。便是吾之福德。果能念得如來聖號。便是吾之因緣。安有不往生之理。法華經云。心生大歡喜。自知當作佛。

佛說阿彌陀經

(依梁陳人書
襄陽石刻經)

鳩摩羅什譯

如是我聞。一時佛在舍衛國祇樹給孤獨園。與大比丘僧千二百五十人俱。皆是大阿羅漢。衆所知識。長老舍利弗。摩訶目犍連。摩訶迦葉。摩訶迦旃延。摩訶俱絺羅。離婆多。周利槃陀迦難陀。阿難陀。羅睺羅。憍梵波提。賓頭盧。頗羅墮。迦留陀夷。摩訶刍賓那。薄拘羅。阿菟樓駄。如是等諸大弟子。並諸菩薩。摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。及釋提桓因等。無量諸天大衆俱。

爾時佛告長老舍利弗。從是西方過十萬億佛土。有世界名曰極樂。其土有佛號阿彌陀。今現在說法。舍利弗。彼土何故名爲極樂。其國衆生。無有衆苦。但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶周匝圍繞。是故彼國名爲極樂。又舍利弗。極樂國土。有七寶池。八功德水。充滿其中。池底純以金沙。

布地。四邊階道。金銀琉璃玻璃合成。上有樓閣。亦以金銀琉璃玻璃礫赤珠瑪瑙而嚴飾之。池中蓮華。大如車輪。青色青光。黃色黃光。赤色赤光。白色白光。微妙香潔。舍利弗。極樂國土。成就是加德莊嚴。又舍利弗。彼佛國土。常作天樂。黃金爲地。晝夜六時。雨天曼陀羅華。其土衆生。常以清旦。各以衣祴。盛衆妙華。供養他方十萬億佛。卽以食時。還到本國。飯食經行。舍利弗。極樂國土。成就是功德莊嚴。復次舍利弗。彼國常有種種奇妙雜色之鳥。白鶴。孔雀。鸚鵡。舍利。迦陵頻伽。共命之鳥。是諸衆鳥。晝夜六時。出和雅音。其音演暢。五根五力。七菩提分。八聖道分。如是等法。其土衆生。聞是音已。皆悉念佛念法念僧。舍利弗。汝勿謂此鳥實是罪報所生。所以者何。彼佛國土。無三惡道。舍利弗。其佛國土。尙無惡道之名。何況有實。是諸衆鳥。皆是阿彌陀佛。欲令法音宣流。變化所作。舍利弗。彼佛國土。微風吹動。諸寶行樹。及寶羅網。出微妙音。譬如百千種樂。同時俱作。聞是音者。自然皆生念佛念法念僧之心。舍利弗。其佛國土。成就如是功德莊嚴。

舍利弗。於汝意云何。彼佛何故號阿彌陀。舍利佛。彼佛光明無量。照十方國。無所障礙。是故號爲阿彌陀。又舍利弗。彼佛壽命。及其人民無量無邊阿僧祇劫。故名阿彌陀。舍利弗。阿彌陀佛。成佛已來。於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩衆。亦復如是。舍利弗。彼佛國土。成就如是功德莊嚴。

又舍利弗。極樂國土。衆生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。

舍利弗。衆生聞者。應當發願。願生彼國。所以者何。得與如是諸上善人。俱會一處。舍利弗。不可以少善根福德因緣。得生彼國。舍利弗。若有善男子善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。專稱名號。以稱名故。諸罪消滅。卽是多善根福德因緣。(此四句依梁陳人書襄陽石刻經本補入)其人臨命終時。阿彌陀佛。與諸聖衆。現在其前。是人終時。心不顛倒。卽得往生阿彌陀佛極樂國土。

舍利弗。我見是利。故說此言。若有衆生。聞是說者。應當發願。生彼國土。

舍利弗。如我今者。讚歎阿彌陀佛。不可思議功德之利。東方亦有阿閃鞞佛。須彌相佛。大須彌佛。須彌光佛。妙音佛。如是等恆河沙數諸佛。各於其國出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。南方世界。有日月燈佛。名聞光佛。大燄肩佛。須彌燈佛。無量精進佛。如是等恆河沙數諸佛。各於其國出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。西方世界。有無量壽佛。無量相佛。無量幢佛。大光佛。大明佛。寶相佛。淨光佛。如是等恆河沙數諸佛。各於其國出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。北方世界。有燄肩佛。最勝音佛。難沮佛。日生佛。網明佛。如是等恆河沙數諸

佛。各於其國出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。下方世界。有師子佛。名聞佛。名光佛。達磨佛。法幢佛。持法佛。如是等恆河沙數諸佛。各於其國出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。上方世界。有梵音佛。宿王佛。香上佛。香光佛。大燄肩佛。雜色寶華嚴身佛。娑羅樹王佛。寶華德佛。見一切義佛。如須彌山佛。如是等恆河沙數諸佛。各於其國出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。於汝意云何。何故名爲一切諸佛所護念經。

舍利弗。若有善男子善女人。聞是經受持者。及聞諸佛名者。是諸善男子善女人。皆爲一切諸佛之所護念。皆得不退轉於阿耨多羅三藐三菩提。是故舍利佛。汝等皆

當信受我語。及諸佛所說。舍利弗。若有人。已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。苦已生。若今生。若當生。是故舍利佛。諸善男子。善女人。若有信者。應當發願。生彼國土。舍利弗。如我今者。稱讚諸佛。不可思議功德。彼諸佛等。亦稱讚我。不可思議功德。而作是言。釋迦牟尼佛。能爲甚難希有之事。能於娑婆國土。五濁惡世。劫濁見濁。煩惱濁。衆生濁。命濁中。得阿耨多羅三藐三菩提。爲諸衆生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。是爲甚難。佛說此經已。舍利弗及諸比丘。一切世間天人阿修羅等。聞佛所說。歡喜信受。作禮而去。

佛說阿彌陀經終

天台智者大師十疑論

一疑。諸佛菩薩。以大悲爲業。若欲救度衆生。祇應願生三界。於五濁三塗中。救苦衆生。因何求生淨土。專爲自利。捨離衆生。毋乃闕大慈悲。障菩提道耶。

答。菩薩有二種。一久修行菩薩。已曾親近諸佛。悟得無生法忍者。一初發心菩薩。未嘗親近諸佛。未得無生法忍者。久修行菩薩。有大神通。有大威力。故能爲天爲仙。爲帝爲王。爲鬼爲畜。出入生死。廣度衆生。若初修行人。力量淺薄。雖發菩薩之心。猶住凡夫之地。自疾不能救。焉能救他人。故智度論云。具縛凡夫。有大悲心。願生濁世。救苦衆生者。無有是處。何以故。五濁世中。聲色貨利。刻刻糾纏。煩惱怨家。重重密布。略一失足。便成墮落。縱使得生人中。難逢有佛之世。縱使有佛出世。難生信向之心。幸而信向佛乘。修行出家。轉生若遇大富大貴。未免耽著塵緣。廣造衆惡。從此一失人身。何時更當解脫。所以有智慧人。將欲度生。先求見佛。果能一心不亂。念佛往生。業

已爲金剛不壞之身然後可行。隨類度生之願。譬如救溺。須自乘舟筏。方能引入水。若徒從井救人。未有不與之俱溺者。非闕慈悲也。正善用其慈悲也。

二疑。諸法體空。本來無生。平等寂滅。何乃捨此求彼。欲生西方。經云。心淨則佛土淨。欲求淨土。當先淨心。何乃不求淨心而求淨土。

答。欲生西方者。謂是捨此而求彼。則不欲生西方者。獨非捨彼而求此耶。若云。彼此兩無所求。是執斷見矣。若云。彼此兩無所捨。是執常見矣。維摩經云。雖知諸佛國。及與衆生空。而常修淨土。教化諸羣生。故雖熾然往生。不礙無生之理。至於心淨佛土淨之說。有理有事。若言乎理。何見求生者之心必非淨而不求生者之心反爲淨耶。若言乎事。與其淨此心以居五濁惡世。何如淨此心以居極樂蓮邦耶。况居濁世者之求淨而不淨。在蓮邦者之不求淨而自淨耶。

三疑。十方諸佛土。功德皆平等。何不普念一切功德。生一切淨土。而乃偏求一佛淨土耶。

答。諸佛淨土。固皆平等。但衆生根鈍。濁亂者多。若不專心一處。三昧難成。故專念阿彌陀佛。卽是一相三昧。隨願往生。經云。普廣菩薩問佛。十方悉有淨土。世尊何故偏讚西方彌陀淨土。專遣往生。佛告普廣。閻浮提衆生。心多濁亂。爲此偏讚西方。一佛淨土。使諸衆生。專心一境。易得往生。華嚴經云。一切諸佛身。卽是二佛身。譬如淨滿月。普應一切水。故知念一佛。卽是念一切佛。生一淨土。無異生一切淨土也。

四疑。十方佛土。無量無邊。隨念一佛。皆得往生。何爲偏念阿彌陀佛。

答。有三因緣。一阿彌陀佛與娑婆世界有緣故。無量劫前。發四十八種誓願。皆欲接引念佛衆生故。今娑婆世界人。信口念佛。必稱阿彌陀。將來衆生福薄。法欲滅時。諸經皆去。獨有阿彌陀經。遲去百年。非其驗何。一因本師釋迦如來指示故。三藏十二部經。所說甚廣。獨有持名一法。不念他佛。但念阿彌陀。苟非至切至要。胡爲再四諄諄。一因十方諸佛皆作證明故。蓋淨土法門。係難信之法。故世尊每說阿彌陀佛。旣有十方如來。其作證明。以見不可不信。然則欲修淨業者。安得不專念彌陀哉。

五疑。具縛凡夫。惡業厚重。一切煩惱未斷。一毫福德未修。若西方淨土。已是超出三界。過於天帝天仙。百千萬億恆河沙倍。凡夫念佛。安能遂生其國。

答。此仗阿彌陀佛之力。非藉自己之力也。譬之跛人行路。終日不能數里。若乘轉輪王之象寶。一朝能歷四大天下。又如寒士欲親近帝王。倘從州縣小試。以望登科甲位通顯。則難而未穩。若能託胎而爲王子。不過旬月之間。便與帝王同爲一家。往生者之專仗佛力亦猶是也。修行人若不求生淨土。僅在惡濁世界修持。則頭出頭沒。不知經若干年劫。尙不能成一羅漢。何況至於菩薩地位。若修淨土法門。只要精進修持。一心不亂。現世便可往生。竟從西方修行永不退墮。直至成佛。最爲捷徑。譬如竹中之蟲。向上欲出。必要齧穿無數竹節。不勝其苦。若識得從旁便可齧穿。則橫出甚易。所以修淨業者。謂之橫出三界。而何疑凡夫之不能遂生也。

六疑。九品之中。下三品多是惡人。止因臨終念佛。所以往生萬一。既生彼國。仍有邪三毒。奈何。

答。只愁不生。不愁生後復惡。其中蓋有五因緣。一者阿彌陀佛大悲願力所持故。二者所願如意。無所貪求故。三者寶樹華鳥。咸宣妙法故。四者純以菩薩爲良友。惡緣永斷故。五者壽命長遠。歷劫修持故。所以一生西方直至成佛永不退轉。良有以也。七疑。繼釋迦而成佛者。卽彌勒菩薩。今現在兜率天宮說法。人能修上品十善。便生其處。何不往生兜率天宮。親侍彌勒。將來下生成佛之時。隨之而下乎。

答。上品十善。固得生天。但欲必生兜率。恐亦未穩。不觀彌勒上生經乎。經云。行衆三昧。深入正定。方始得生。試問修十善者。能之乎。若阿彌陀佛但得持名。無不攝受。較之廣修十善者。其易數倍。况兜率天宮。多欲界退位天子。天女之多。不可勝計。天人見之。往往耽染。何況凡夫。薩遮尼乾子經云。諸天大繫縛。無過於女色。女人縛諸天。將至三惡道。較之西方。萬不及一。又况縱見彌勒。未獲聖果。一生淨域。永不退轉乎。八疑。凡夫宿世今生。廣造無量惡業。臨終十念。云何遂得往生。

答。今世造惡。臨終十念往生者。必其宿世修行。今生不過一念之迷耳。不然。臨歿之

時。惡緣必至矣。安能反遇善知識。教以念佛乎。卽教以念佛。彼安得而聽言乎。况彼念佛之時。必其幡然覺悟。痛悔前非。大怖切心。萬緣齊放。止認西方一條路。更無別處可回頭。如此念佛。雖然一句。可當千聲。所以十六觀經云。念念中滅八十億劫生死之罪。果能辦著此種精誠。又加以宿生福業。佛來接引。夫亦何疑。

九疑。極樂國土。去此娑婆世界。尙有十萬億佛土。如此遼遠。凡夫豈能卽到。又聞女人根缺。及二乘人。皆不得往生信乎。

答。道遠難去者。形也。一念可往者。心也。念佛者。生彼國土。只在此心。非挾此形骸以往也。如人夢遊他國。雖在千萬里外。一呼便醒。豈因道近易覺。道遠難覺耶。女人及根缺不生者。謂極樂國土。無有女人。及根缺之人也。非謂女人及根缺者。不得往生也。若女人不得往生。則章提希阿闍世王之母與五百侍女。世尊何以授記其悉得往生乎。無量壽經四十八願中。佛有一願云。設我得佛。十方世界一切女人。稱我名號。厭惡女身。捨命之後。更受女身者。不取正覺。女人如此。根缺可知。且鴈鴿鸚鵡。尙因念佛

而往生。一見淨土文一見法苑珠林

豈根缺者反不如異類耶。至於二乘乃果位中人。凡夫尙得往

生。豈有反擯二乘之理。阿彌陀經云。彼佛有無量無邊聲聞弟子。皆阿羅漢。將謂獨非二乘耶。故謂生彼國者。無二乘之執心。則可謂二乘不往生彼國者。卽無二乘則不可。

十疑。今欲決定求生西方。未知作何功行。何等發心。得生彼國。又世俗之人。皆有妻子。未知不斷淫慾得生彼國否。

答。欲決定生西方者。持名之外。當具二種念力。必得往生。一者。當生厭離濁世之念。二者。當生欣慕樂邦之念。又當發菩提心。隨力作善。以回向之。未有不往生者。至於妻子之緣。在俗亦所不礙。苟能使之其沾法味。斷不因之而反種孽根。所謂厭離濁世者。濁惡世中。動生荆棘。世人只爲衣食二字。困苦一生。爲名利兩途。奔波一世。手忙脚亂。甘爲妻子做家奴。晝想夢思。總爲色身尋煩惱。自想七尺形軀。外面只因一片皮包。所以妄自尊大。若將天眼一觀。中間不過滿腹尿溺。及濃血惡露而已。所以

涅槃經云。如是身城愚癡羅刹。止住其中。何有智慧者。當樂此身。而謂不當厭離乎。所謂欣慕樂邦者。西方之樂。非天宮之可比。不可以言語形容。每日但將經中所言。一一靜想。以爲吾將來必定到此。則欣慕之念自生。淨土之緣自熟。云何謂發菩提心。往生論云。菩提心者。誓願成佛之心也。誓願成佛者。憐憫一切衆生。輪回六道受苦無極。是以發心救度。使其超出三界。同至西方極樂國土而後已。念佛之人若能具此二種念力。又加以發菩提心。仰體如來度人之意。有不決定往生。蒙佛受記者。未之有也。

儒者不信因果。非不信佛也。乃不信儒也。易曰。積善之家。必有餘慶。積不善之家。必有餘殃。書曰。作善降之百祥。作不善之百殃。一人信因果而作一善。萬人卽增萬善。否則人人不信因果。大亂之道也。

天如禪師答淨土二十二問

一問。永明壽禪師。海內推爲宗匠。而自修淨土。且以教人。謂有禪無淨土。十人九差路。無禪有淨土。萬修萬人度。無乃自屈其禪而過讚淨土耶。

答。永明大師。非過讚也。淨土法門至廣至大。淨土修法至簡至易。廣大者。一切機緣。收攝都盡。上而等覺位中菩薩。下至愚夫愚婦。五逆十惡之徒。臨終念佛悔過。無不往生也。簡易者。初無艱難勞苦之行。但持六字名號。即便往生。得不退轉。直至成佛而後已也。試問修行出世更有捷於此者乎。非壽禪師不能以此自修。非壽禪師不能以此教人也。

二問。廣大簡易。既聞命矣。但禪宗悟達之士。既曰見性成佛。何必復求淨土耶。

答。惟其悟達故願求生。汝但未悟耳。使汝既悟。則淨土之趨。萬牛難挽矣。且汝謂一悟之後。結習已除。諸漏已盡。無量劫來之怨對已消。更不復受後有耶。抑或尙有結

業未完不免重報輕受耶。且謂一悟之後。遂具三十二相。八十隨形好。降伏天魔。救度十方世界乎。抑或神通威力一時尙未具足。猶待他生後世也。倘謂只消一悟。大事已畢。則諸大菩薩之廣修六度。動經塵劫者。反有愧於汝矣。觀佛三昧經。載文殊菩薩自敘宿因。謂得念佛三昧。世尊記之曰。汝當往生極樂世界。華嚴經載。普賢菩薩以十大願王。教善財童子。亦終之以導歸極樂。楞伽經中。世尊授記龍樹。亦有往生極樂之語。至於大寶積經。世尊印許淨飯王。及七萬釋種。同生安養。十六觀經。指示韋提希。及五百使女。同覲彌陀。若夫東土之廬山遠公。天台賢首諸宗尊者。無不宣揚淨業。共修西方。豈其所悟所證。反出今人下耶。

三問。淨土攝機。誠哉廣矣。然所謂淨土者。在十萬億佛刹外。較之唯心淨土。本性彌陀之說。似乎著迹矣。

答。楞嚴經云。色身外。洎山河虛空大地。咸是妙明真心中物。又云。諸法所生。唯心所現。安有佛土而在心外者哉。當知心外無土。土外無心。所謂十方微塵國土者。唯我

心中之土也。三世恆沙諸佛者。惟我心中之佛也。知此則知無一土不依我心而立。無一佛不因我性而現。然則十萬億刹外之極樂。獨非唯心之淨土。極樂國中之教主。非本性之彌陀乎。

四問。淨土之說。蓋表法耳。智者當直悟禪宗。方爲上著。若只讚揚淨土。將毋執著事相。不明理性耶。

答。歸元性無二。方便有多門。識得此意。則禪宗淨土。殊途同歸。中降大師云。禪者淨土之禪。淨土者。禪之淨土。雖互爲闡揚。而修之者必貴一門深入。故大勢至菩薩。得念佛三昧。而曰以念佛心入無生忍。普賢菩薩。入華嚴不思議解脫境界。而曰願我命終時往生安樂刹。是二大士。一侍娑婆教主。一侍安養導師。宜各立門戶。而乃和會圓融。兩不相礙。安得尙執偏見耶。且爾云淨土表法者。豈不以淨心卽是淨土。不復有七寶莊嚴之淨土乎。果爾。則亦將謂善心卽是天堂。不必更有夜摩忉利。惡心卽是地獄。不必更有刀劍鑊湯。愚癡卽是畜生。不必更有披毛戴角耶。然則既有寂

光淨土。必有實報莊嚴等土可知。况事外無理。相外無性。定要捨事求理。離相覓性。則理事尙不能無礙。安望其事事無礙乎。且爾雖具如來之性。現在猶是凡夫之身。若果能隨處淨土。試問能於廁溷之中。安之如衽席否。能於犬豕牛馬同槽而食否。能於腐爛屍骸蛆蟲鑽齧者。同寢同眠否。如其能之。任汝說高山平地。總西方。任汝說縱遇風刀常坦坦。若猶末也。則是穢淨之見未空。愛憎之情猶在。而乃以過量境界。侈口高談。使淺見之夫。略讀幾本經書。略看幾則公案。便欲謗法造罪。伊誰之咎哉。

五問。修行求出生死。故貴無生。慕西方而願往。得毋乖於無生之義乎。

答。以生爲生者。常見之所失也。以無生爲無生者。斷見之所惑也。生而無生。無生而生者。第一義諦也。蓋妙真如性。本是無生。因緣和合。乃有生相。以性能現相。故曰無生。卽生。以相由性現。故曰生。卽無生。知此。則知淨土之生。惟心所生。若疑遠而難到。則心包太虛。量周法界。夫何遠之有。

六問十方佛土淨妙者多。今偏指極樂。又偏讚其境勝緣勝。何耶。

答。此間國土。衆苦所歸。縱有樂緣。皆招苦果。西方不然。所以經云。是諸衆生。無有衆苦。但受諸樂。故名極樂。試以兩土略一較量。豈特天淵。只如此方投胎。必在胞十月。分娩之際。與鬼爲鄰。彼則質託蓮房。安坐妙香宮殿。既不受胞胎之污穢。復不累母氏之劬勞。而人世之生苦謝矣。此方年老之人。髮白面皺。腰曲背駝。坐起須人。奄奄一息。彼則法味資神。永無衰老。十方國土。瞬息往來。而人世之老苦免矣。此方一遇疾病。則呻吟牀褥。宛轉哀號。彼則具大神通。有大威力。國中不聞痛癢之名。而人世之病苦絕矣。此方人必有死。死必有罪。唯有低頭就縛。押付閻羅。彼則一託蓮胎。便成金剛不壞之體。相好光明。壽命無量。而人世之死苦捐矣。此方有合必有離。劬勞之父母難保長存。恩愛之夫妻類多各散。彼則法中眷屬。永遠相親。甯有愛別離之苦乎。此方讎敵相尋。有怨必報。大怖切心。無可逃避。彼則相親相敬。無非菩薩勝友。相與周旋。曾有怨憎會之苦乎。此方人類。皆爲衣食奔波。妻子驅遣。困苦萬狀。彼則

念衣衣來。想食食至。宮殿園林。無非七寶。各各受用。自然曾有所求闕絕之苦乎。不特此也。此方則醜穢形骸。根多缺陋。彼國則光明赫奕。相好莊嚴。此方則頭出頭沒。輪轉生死。彼國則一證無生。永不退轉。此方則丘陵坑坎。荆棘成林。彼國則寶樹參天。黃金爲地。又此方則觀音勢至。徒仰嘉名。彼國則二大菩薩。親爲勝友。彼此較觀。境緣迴勝。境勝者。可以攝取淨心。緣勝者。可以助修行之力也。

七問。欣厭之心。卽愛憎之念。愛憎乃生死岸頭事。非修行人所宜。柰何。

答。厭離娑婆。欣慕極樂。雖具愛憎之心。然非世間之愛憎。乃十方如來轉凡成聖之愛憎也。若非厭離。何以脫此娑婆濁世。若非欣慕。安能生此極樂蓮邦。蓋惟厭離而後能轉。凡欣慕而後能成聖也。

八問。此間飲食衣服。宮室器皿。必待營爲。方能受用。云何極樂世界。一應享福之事。皆可自然而來。

答。享福之事。皆從修福而來。北俱盧洲。其飲食衣服。皆能受用現成。何況阿彌陀佛。

萬福莊嚴之寶刹乎。大阿彌陀經云。此講堂宮宇。初無作者。亦無所從來。以彼佛願大德重。自然化生。又云。他方佛刹。悉皆爲善。無造惡之所。故其福德亦皆自然。其次有世界。爲善者多。爲惡者少。亦有自然之福。不待修營。若此世界。爲惡極多。爲善極少。故不自修治。物無自有。

九問。念佛往生者。臨終之時。皆見佛與菩薩親來接引。經云。誦持往生呪三十萬遍。阿彌陀佛常住其頂。衛護是人。假令十方世界皆誦眞言。皆求佛與菩薩接引。阿彌陀佛安能皆住其頂。往而迎之乎。

答。天上日月之光。猶能普照世界。不患光之不足。何況佛之誓願神通乎。

十問。法華會上。普賢菩薩。現坐道場。衆菩薩盡其神力。不能得見。今往生者皆博地凡夫。如何卽能見佛。就其所見之佛。果與菩薩所見之佛無異乎。

答。佛相總如是。所見各不同。初生西方者。所見不過佛之麤相。如三十二相。八十隨形好之類。若華嚴經所云。如來有十華嚴藏世界海微塵數大人相。恐非大菩薩不

能見也。譬之諸天所食須陀之味，一器之中，色味各別。又如病人與無病人共嘗一物，甘苦絕殊。所以世尊以足指按地，大千世界，皆成金色。獨有螺髻梵王得見餘，皆不知淨土聖境亦復如是。

十一問。此間念佛。西方七寶池中。卽生蓮華一朵。若能精進。其華漸大。倘或退惰。其華萎落。信乎。

答。此易明也。譬之大明鏡中。凡有物來。必現其影。且如舍衛城中樹提伽樓閣。不過白銀琉璃所成。然其牆壁中。猶能現出一城中事。何況阿彌陀佛清淨莊嚴之寶刹乎。此間念佛。彼土生蓮。固無疑也。

十二問。帶業往生。且得不退。則人於生前。世緣未了。何不且做世間事業。直待臨終。然後念佛乎。

答。此邪說也。存此一念。自誤多矣。發此一言。誤人多矣。惡人臨終念佛往生者。必宿有善根。又遇得善知識。所以臨終有此僥倖。此乃千萬人中的一。豈各人臨終皆有

此僥倖哉。羣疑論云。世間有十種人。臨終不得念佛。一者。善友未必相遇。二者。業累纏身。不遑念佛。三者。偏風失語。四者。狂亂失心。五者。或遭水火。六者。遭遇豺狼。七者。惡友壞其信根。八者。飽食過度。昏迷猝死。九者。陣亡。十者。高巖失足。有一於此。便難念佛。縱使好病而死。當四大分離之候。亦未免風刀解體。恐怖惶惶。豈暇安心念佛。又或業緣未畢。世念未休。家私未明。後事未辦。而且求醫問卜。擾亂其心。子哭妻啼。驚惶其耳。方寸之內。一無主張。當此之時。求其從容念佛。希其一心不亂。萬無此理。所以古人云。莫待老來方念佛。孤墳多是少年人。又云。平時勸人念佛。皆說我忙。獨至無常一到。極忙也休。人生在世能有幾時。乘此未老未病。便當屏棄俗緣。幹辦要事。得一日光陰。念一日佛號。得一時工夫。修一時淨業。不然一失人身。萬劫難復矣。危哉。

十三問。待老修行固無此理。但凡夫皆在世網中。有事不能撥棄。奈何。答。人生世間。心有一死。修與不修。總不得免。與其墮落。孰若超升。苟其痛念無常。何

患用心不切。無論處靜處忙。順境逆境。總與念佛求生兩不相礙。縱使世緣極重。亦當忙裏偷閒。定爲日課。或萬或千。不可間斷。其冗忙之極者。晨朝十念。定不可闕。十四問。一心不亂。一日至七日。卽得往生。或一日七日內一心。此後如不能一心。未知亦得生否。

答。既能一心。以後心卽稍散。定不至於大散。如顏子三月不違仁。三月以內。固是仁人。豈三月以後。遂爲惡人耶。苟能常自檢點。屢發宏願。無不生者。

十五問。念佛者。念念相續。功方能密。但暑月之內。裸體時多。安得竟日衣冠。未知飲食坐臥裸形盥漱時。皆可念佛否。

答。默念無妨。所謂造次必於是。顛沛必於是也。

十六問。一心稱名時。又發求生淨土之心。似乎雜以兩念。如之何。

答。稱名固所以求生也。經云。應當發願。求生彼國。又云。執持名號。則知固一事非兩事也。譬之。做舉業家。其欲得功名。求生淨土也。其讀書作文。執持名號也。此處似有

微分也。則求生之念。宜於早晚發願時。若稱名之刻。又當專一其心。不可使之以夾雜也。

十七問。終日念佛。遇福則作。固是學人本分。但作福時。未免心在福事。不在佛號。未識有礙一心不亂否。

答。明鏡本空。物來則現。於鏡空何礙。人但事未至而將迎。事已過而留滯。乃爲病耳。十八問。父母之恩最難圖報。若能往生西方。未識有法可以報恩否。且人生一世。卽有一父母。若百千萬億世。卽有百千萬億父母。未知往生之後。能各記憶姓名。各知其所在。可以一一報之乎。

答。欲報之德。昊天罔極。此世俗之言也。以世俗之道報。親誠無可報之法。若往生之後。欲報其親。則易易矣。豈惟報一世之親。卽欲報百千萬億世以前之父母。亦有報之之法。蓋人一至西方。必得神通天眼。能見無數世界之事。必得神通天耳。能聽無數世界之聲。必具他心通智。能知一切衆生之心。必得宿命通智。能知無量劫前死

此生彼之事。所謂某人在某處。如是名。如是姓。如是種族。如是居里。纖悉皆知。可以惟我所爲。盡其報效。豈有父母之恩不能酬答乎。昔孟子稱舜之孝曰。爲天子父尊之至也。以天下養養之至也。使吾往生爲菩薩。俾父母爲菩薩之父母。不更尊於人類乎。且使父母得生淨土。念衣衣來。想食食至。受自然之福。享無極之壽。不更愈於以天下養乎。况一國土中。不過一位天子。若有第二位孝子出來。也要想著以天下養。則必謀爲不軌。反做亂臣賊子矣。豈若淨土法門之盡人可以展其孝。仍無礙於世法乎。

十九問。異類衆生。在三惡道中受苦者。其數無量。吾安能一一救之。而徒發此虛願乎。

答。菩薩欲普度衆生。則一應三惡道中受苦者。皆我分內應度之人。豈可因其多而有畏心。因其多而有厭心。倦心乎。地藏菩薩云。地獄不空。誓不成佛。普賢菩薩十大願。願願以盡衆生界爲期。然則修淨業者。欲生西方。不當以回入娑婆。誓拔三途爲

願乎。

二十問。微細物命。其類其多。假令每見物類。卽發救度之心。不識此心僅能畢我志願乎。抑或仍有益於彼乎。

答。當觀發心之誠否。苟能竭我之誠。無不有益於彼。觀世尊往劫爲忍辱仙人。目連往劫爲樵夫事。便知發心之有益。釋迦如來。於無量劫前。爲忍辱仙人。在山中修道。遇國王出獵。逐一走獸。問道人獸今何往。此時若實告之。則害獸。不實告又妄語。沈吟未對。國王怒斫去一臂。又問之。亦沈吟不對。又斫去一臂。道人乃發願云。我成佛後。當先度此人。勿使世人效彼爲惡。後首度比邱橋陳如。卽當時國王也。佛世有一城人難化。佛言。此輩人與目連有緣。因遣之往。其人果皆向化。問佛因緣。佛言。目連往劫。曾爲樵夫。驚起無數亂蜂。目連戒之曰。汝等皆有佛性。他時我若成道。當來度汝。今此城人。乃當日聚蜂也。因其曾發一念。故與有緣。觀此不特見一切人類亦當代其念佛發救度之想矣。

二十一問。念佛雖誠。然所念之數有限。假令百命而以千聲佛號施之。百命自然隱沾其福。萬一恆沙物命。而亦千聲佛號施之。其福轉微奈何。

答。譬如一炬。百人分去。此炬如故。千人萬人分之。此炬亦如故。

二十二問。昔有二僧於念佛時。觀想身坐大蓮華內。作蓮華開想合想。如是五月。皆得往生。不知念佛者。可以之爲程式否。

答。可。然畢意以念佛爲主。

大無量壽經云。彌勒白佛言。於此世界。有幾菩薩。往生極樂。佛告彌勒。於此世界。有六十二億不退菩薩。往生彼國。小行菩薩。不可稱計。不但此國。他方佛土。如遠照佛刹。有百八十億菩薩。皆當往生。乃至十方佛刹。往生者甚多無數。我若具說。一劫猶未能盡。

蓮宗十一祖傳

蓮宗初祖

師諱慧遠。姓賈。雁門樓煩人。幼而好學。博綜六經。尤善莊老。時道安法師建刹於太行恆山。師往歸之。一面盡敬。初聞安師講般若經。豁然開悟。因投簪受業。精思諷誦。以夜繼晝。安師常臨衆嘆曰。使道流東國者。其在遠乎。年二十四。大善講貫。太元六年。至潯陽。見廬山閒曠。可以息心。欲立精舍。以去水猶遠。舉杖扣地曰。若此可居。當使朽壤抽泉。言畢。清泉涌出。潯陽亢旱。師詣池側讀海龍王經。忽見神蛇從池而出。須臾大雨。歲竟有秋。因名龍泉精舍。時師同門慧永禪師。先居廬山西林。欲邀同止。而師學侶浸衆。西林隘不可處。永師乃謂刺史桓伊曰。遠公方富宏道。而貧道所棲隘不可處。是夕師夢山神告曰。此山足可棲神。願毋他往。忽於後夜大雨雷震。詰旦林麓廣闊。素沙布地。榎栲文梓。充布地上。不知所自至。伊大敬感。更爲師建刹。名其

殿曰神運。以在西林之東。故遂號東林。時太元十一年也。於是乃造西方三聖像。建齋立社。鑿池種蓮。於水上立十二葉蓮華。因波隨轉。分刻晝夜。以爲行道之節。主張蓮宗。蓮風大振。旣而四方息心緇侶。絕塵信士。聞風不期而至者。凡百二十三人。共結蓮社。六時行道。一意西歸。令劉遺民著發願文。勒之石。時王喬之等數人。復爲念佛三昧詩。以見志。師爲作序曰。夫稱三昧者何。思專想寂之謂也。思專則志一不分。想寂則氣虛神朗。氣虛則智悟其照。神朗則無幽不徹。是二者。自然之玄符。會一而致用也。又諸三昧。其名甚衆。功高易進。念佛爲先。何者。窮玄極寂。尊號如來。體神合變。應不以方。故令入斯定者。昧然忘知。卽所緣以成鑒。鑒明則內照交暎。而萬象生焉。非耳目之所暨。而見聞行焉。於是靈相湛一。清明自然。元音叩心。滯情融朗。非天下之至妙。孰能與於此哉。所以奉法諸賢。咸思一揆之契。感寸陰之將頽。懼來儲之未積。洗心法堂。整襟清向。夜分忘寢。夙興唯勤。庶夫貞詣之功。以通三乘之志。仰援超步拔茅之興。俯引弱進垂策其後。以此覽衆篇之揮翰。豈徒文詠而已哉。初是大

教流行。江東經藏未備。道法無聞。師遣弟子法淨。法領等。遠越葱嶺。曠歲來還。購諸梵本。並傳關中。先是此土未有泥洹常住之說。但言壽命長遠。師曰。佛是至極無變。無變之理。豈有窮耶。乃著法性論十四篇。以明泥洹常住旨之。什師見而嘆曰。邊方未見大經。便闍與理合。經言。末代東方有護法菩薩。欽哉仁者。善宏其道。曇摩流支入秦。師遣弟子曇邕。請於關中。出十誦律流傳晉國。及佛馱跋陀羅至。師卽請出禪數諸經。所有經律。出自廬山。幾至百卷。有行者來侍師。善驅蛇。蛇爲盡去。因號辟蛇行者。有一虎往來。時見行跡。未嘗傷人。人號遊山虎。師與社衆每遊憩上方峯頂。患去水遠。他日有虎跑其石。水爲之出。因名虎跑泉。師居東林三十餘年。跡不入俗。每若送客。常以虎溪爲界。領衆六時行道。未嘗一日暫輟。深信切願。專志西方。澄心繫念。三觀聖相。而沈厚不言。後義熙十二年。七月晦夕。於般若臺。方從定起。見阿彌陀佛身滿虛空。圓光之中。有諸化佛。觀音勢至左右侍立。又見水流光明分十四支。洄注上下。演說苦空無常無我之音。佛告曰。我以本願力故。來安慰汝。汝七日後。當生

我國。又見社中先化者。佛馱耶舍。慧持。義熙八年先逝慧永。義熙十年先逝劉遺民。義熙六年先逝在佛

之側。前揖師曰。師志在先。何來之晚。既知時至。卽語弟子法淨。惠寶曰。吾始居此。十一年中。三覩聖相。今復見之。當生淨土必矣。又曰。七日之期。斯爲漸矣。卽自製遺誠。至期。端坐入寂。年八十三。卽義熙十二年八月六日也。遺命弟子。露骸於松林之下。卽嶺爲墳。與土木同狀。弟子等不忍露骸。與潯陽太守阮侃。奉全身建塔於西嶺。謝靈運。及宗炳。各立碑以銘遺德。所著有廬山集十卷。行世。唐宣宗大中二年。追謚辯覺大師。昇元三年。追謚正覺。宋太宗太平興國三年。追謚圓悟大師。凝寂之塔。

蓮宗二祖

師諱善導。不詳其所出。人皆稱善導和尚。云是阿彌陀佛化身也。唐貞觀中。見西河綽禪師。淨土九品道場。喜曰。此真入佛之精要。修餘行業。迂僻難成。唯此法門。速超生死。於是勤篤精苦。晝夜禮誦。旋至京師。激發四衆。每入室長跪唱佛。非力竭不休。出則演說淨土法門。三十餘年。未嘗睡眠。護持戒品。纖毫不犯。好食供衆。粗惡自奉。

所有嚩施。用寫阿彌陀經。十萬餘卷。畫淨土變相三百餘壁。修營塔寺。燃燈續明。三衣瓶鉢。不使人持。行不共衆。恐談世事。道俗從其化者甚衆。有誦彌陀經。十萬至五十萬遍者。有日課佛名。一萬至十萬者。其間得三昧。生淨土者。不可紀述。或問念佛生淨土耶。師曰。如汝所念。遂汝所願。其勸世偈曰。漸漸雞皮鶴髮。看看行步龍鐘。假饒金玉滿堂。豈免衰殘老病。任汝千般快樂。無常終是到來。唯有徑路修行。但念阿彌陀佛。或問。何故不令人作觀。直遣專稱名號耶。答。衆生障重。境細心粗。識颺神飛。觀難成就。是以大聖悲憐。直勸專稱名號。正由稱名易故。相續卽生。若能念念相續。畢命爲期者。十卽十生。百卽百生。何以故。無外雜緣得正念故。與佛本願相應故。不違教故。順佛語故。若捨專念。修雜業者。百中希得一二。千中希得三四。何以故。雜緣亂動失正念故。與佛本願不相應故。與教相違故。不順佛語故。繫念不相續故。心不相續報佛恩故。雖作行業。常與名利相應故。樂近雜緣。自障障他往生正行故。比見諸方道俗。解行不同。專雜有異。但使專意作者。十卽十生。修雜不至心者。千中無一。

普願一切人等。善自思惟。行住坐臥。必須勵心克己。晝夜莫廢。畢命爲期。前念命終。後念卽生。長時永劫。廣受法樂。乃至成佛。豈不快哉。又作臨終正念文曰。凡人臨命終時。欲得往生淨土者。須先準備。不得怕死。常念此身多有衆苦。不淨惡業種種交纏。若得捨此穢身。超生淨土。受無量快樂。見佛聞法。離苦解脫。乃是稱意之事。如脫臭敝之衣。得換珍御之服。放下身心。莫生貪著。纔有病患。莫論輕重。便念無常。一心待死。須囑家人。及問候人。凡來我前。但爲我念佛。不得說眼前閒雜之話。家中長短之事。亦不須輒語安慰。祝願安樂。此皆虛華無益之語。若病重將終。親屬不得垂淚哭泣。及發嗟嘆懊惱之聲。惑亂心神。失其正念。但得同聲念佛。助其往生。若得明曉淨土之人。頻來策勵。極爲大幸。若依此者。決定往生無疑矣。多見世人。平時念佛。發願求生。甚是勤拳。及至臨終。卻又怕死。都不說著往生之事。死門事大。必須自家著力始得。一念差錯。歷劫受苦。誰人相代。思之思之。師自念佛一聲。有一光明從其口出。十至於百。光亦如之。忽一日。謂人曰。此身可厭。吾將西歸。乃登寺前柳樹。向西祝

曰。願佛接我。菩薩助我。令我不失正念。得生安養。祝願已。卽投身而逝。唐高宗皇帝知其神異。賜寺額曰光明云。

蓮宗三祖

師諱承遠。不詳其所出。始學於成都唐公。次資川詵公。至荊州進學於玉泉真公。公令居衡山設教。人從其化者萬計。始居山西南巖石之下。人遺食則食。不遺者食土泥草木而已。其取衣類是。南極海裔。北自幽都。來求厥道。值之巖谷。羸形垢面。躬負薪樵。以疑僕從而媠之。乃師也。凡化人。立中道而教之。權俾得以疾至。示專念法門。書塗巷。刻溪谷。不勤誘掖。人皆負布帛。斬木石。委之巖戶。師不拒不營。祠宇旣具。賜額曰彌陀寺。營造之餘。悉施與餓疾者。先是有沙門法照者。居廬山。由正定中。趨安樂國。見蒙惡衣侍佛者。佛告曰。此衡山承遠也。出而求之。肖焉。乃從之學。傳教天下。嗣照於代宗時爲國師。見柳子厚集南岳碑乃言其師有至德。度其道不可徵。天子南嚮而禮焉。賜其居曰般舟道場。唐貞元十八年。七月十九日。示寂於寺。年九十一。柳宗元製

碑立石於寺門之右。

蓮宗四祖

師諱法照。不詳其所出。大歷二年。居衡州雲峯寺。慈忍戒定。爲時所宗。一日於僧堂粥鉢中。覩五色祥雲。雲內現山寺。寺東北有山。山下有澗。澗北有石門。門內復有一寺。榜曰大聖竹林寺。他日復於鉢中。見雲中數寺。池臺樓觀。萬菩薩衆。雜處其中。以所見問知識。有一僧曰。聖神變化。不可情測。若論山川勢面。乃五臺也。四年。師於郡之湖東寺。開五會念佛道場。感祥雲彌覆。雲中現樓閣。阿彌陀佛。及二菩薩。身滿虛空。衡州舉郭。咸焚香瞻禮。良久方滅。師復遇一老人。謂曰。汝曾發願往金色世界禮覲大聖。今何輒止。言訖不見。師遂與同志數人。遠詣五台。五年四月六日。至五台縣佛光寺。其夕四更。遙見異光照身。卽之行五十里。得一山。山下有澗。澗北有一石門。見二童子。自稱善財難陀。引至一寺。榜曰大聖竹林寺。如鉢中所見。金地寶樹。以爲莊嚴。入寺登講堂。見文殊在西。普賢在東。坐師子座。萬衆圍繞。而爲說法。師作禮問。

曰末代凡夫。去聖時遠。知識隘劣。障垢尤深。佛性無由顯現。佛法浩瀚。未審修何法門。最爲其要。文殊告曰。汝今念佛。今正是時。諸修行門。無過念佛。供養三寶。福慧雙修。此之二門。最爲徑要。我於過去劫中。因觀佛故。因念佛故。因供養故。得一切種智。是故一切諸法。般若。渡羅蜜。甚深禪定。乃至諸佛。皆從念佛而生。故知念佛。諸法之王。師又問。當云何念。文殊言。此世界西。有阿彌陀佛。彼佛願力。不可思議。汝當繼念。令無間斷。命終決定往生。永不退轉。語已。二大聖同舒金臂。摩師頂曰。汝以念佛故。不久證無上等菩提。若善男女等。願疾成佛者。無過念佛。則能速證無上菩提。師歡喜作禮辭而退。二童子送出寺門。舉頭忽失所在。乃立石標記其處。至四月十三日。師與五十餘僧。同往金剛窟。虔心禮三十五佛名。師禮纔十徧。忽見其處廣大嚴淨。琉璃宮殿。文殊普賢俱在一處。復獨詣金剛窟所。願見大聖。以身撲地。見梵僧佛陀波利。引入一院。額曰。金剛般若寺。異寶莊嚴。光明閃爍。師雖歷覩靈異。而未語人也。是年臘月。於華嚴寺。入念佛道場。憶二大士。記我往生。乃絕粒要期。誓生淨土。至

七月初夜。正念佛時。見一梵僧入謂曰。汝所見臺山境界。胡不傳示世人。言畢不見。師心異之。翌日又見梵僧語如前。師曰。非敢祕聖道。恐生疑謗耳。僧曰。大聖文殊。現在此山。尙招人謗。汝何惜焉。但以所見境界。普告衆生。使見聞者。發菩提心。作毒鼓緣耳。師卽遂憶所見。錄以傳世。明年江東沙門慧從。與華嚴寺諸僧。隨師至金剛窟。及立石標記處。瞻仰舊跡。大衆悲喜未已。忽聞鐘聲。其音雅亮。節解分明。衆愈驚異。知師所見不虛。因書於屋壁。願見聞者。共發勝心。後往竹林寺。於題額處。建寺一區。仍號竹林焉。師於是篤志念佛。日夜無曠。忽見佛陀波利謂曰。汝華已就。後三年華開矣。臘月一日。謂衆曰。吾行矣。端坐而逝。師嘗於并州五會念佛。感代宗皇帝宮中。聞念佛聲。遣使追尋。乃見師勸化之盛。遂召入京。封國師。教宮人念佛。亦及五會。號五會法師。

蓮宗五祖

師諱少康。姓周。縉雲仙都山人。母羅氏。夢遊鼎湖峯。有玉女以青蓮華授之曰。此華

吉祥。當生貴子。及生。青光滿室。作芙蓉香。七歲未語。相者奇之。一日母攜入靈山寺禮佛。母問識否。忽發言曰。釋迦牟尼佛。父母驚異。知其宿具善根。遂捨之出家。年十五。能通法華楞嚴等五部義。尋往會稽嘉祥。學究律部。復往上元隆興聽講。唐貞元初。至洛陽白馬寺。見殿中文字放光。探之。則善導和尚西方化導文也。師祝曰。若於淨土有緣。當使此文再放光明。言已。光復閃爍。光中隱隱有化菩薩。師曰。劫石可磨。我願無易矣。遂至長安光明寺。善導和尚影堂瞻禮。忽見真像升空。謂曰。汝依我教。廣化有情。他日功成。必生安養。師南至江陵。遂一僧謂曰。汝欲化人。當往新定。緣在於彼。言訖不見。乃適新定。乞錢誘小兒念佛。念佛一聲。卽與一錢。如是年餘。凡男女少長。見師皆稱阿彌陀佛。念佛之聲。盈滿道路。遂於烏龍山。建淨土道場。築壇三級。每遇齋日。善信畢集。師乃升座。高聲唱佛。衆共和之。師唱佛一聲。衆見一佛從其口出。十聲則有十佛。如貫珠焉。師謂衆曰。汝見佛者。必得往生。衆聞欣慰。念佛益勵。時衆數千。有不見者。悲感自責。因倍精進。後二十一年十月三日。囑道俗曰。大衆。當於

淨土起欣樂心。於閻浮提起厭離心。汝等此時見我光者。真我弟子。言已。遂放異光。數道寂然而逝。郡人奉全身建塔於臺子巖。號臺巖法師。

蓮宗六祖

師諱延壽。字冲元。杭州錢塘王氏子。自少誦法華經。錢文穆王時。知稅務。多用官錢買放生。命罪當死。引赴市曹。王使人矚之。面色不變。文穆王因釋之。遂投四明翠巖禪師出家。後參天台韶國師。言下大徹。旋受法。爲法眼嫡孫。嘗行法華懺三十一日。備極精懇。夢見觀音菩薩。以甘露灌口。因是得無礙辯才。復於禪觀中。見普賢蓮華。忽然在手。因思宿願未決。故登智者巖。作二鬪。一曰一心禪定。一曰萬善莊嚴淨土。冥心精禱。七拈皆得淨土鬪。於是一意專修淨業。日課佛名十萬。終身期生安養。作神棲安養賦以見志。其文云。彌陀寶刹。安養嘉名。處報土而極樂。於十方而最清。二入觀門。修定意而冥往。四十八願。運散心而化生。爾乃畢世受持。一生皈命。仙人乘雲而聽法。空界作唄而讚詠。紫金臺上。身登而本願非虛。白玉毫中。神化而一心自

慶。詳夫廣長舌讚。十刹同宣。但標心而盡契。非率意而虛傳。地軸迴轉。天華散前。一念華開。見佛而皆登妙果。千重光照。證法而盡廁先賢。考古推今。往生非一。運來而天樂盈空。時至而異香滿室。一真境內。現相而雖仗佛威。七寶池中。覩境而皆從心出。故知聖旨難量。感應猶長。變凡成聖而頃刻。卽迷爲悟而昭彰。探出仙書。眞是長生之術。指歸淨刹。永居不死之鄉。更有出世高人。處塵大士。焚身然臂而發行。掛胃捧心而立軌。仙樂來迎而弗從。天童請命而不喜。或火烈山頂。光明境裏。絕聞惡趣之名。永拋胎獄之鄙。眼開舌固而立驗。牛觸鷄鷓而忽止。處鐵城而拒王勅。須徇丹心。坐蓮臺而賴佛恩。難拋至理。其或誹謗三寶。破壞律儀。逼風刀解體之際。當業鏡照形之時。忽遇知識。現不思議。劍林變七重之行樹。火車化八德之蓮池。地獄消沈。湛爾而怖心。全息。天華飛引。俄然而化佛迎之。慧眼明心。香鑪墮手。應讖而蓮華不萎。得記而寶林非久。奇哉佛力難思。古今未有。又作四料簡。一曰有禪無淨土。十人九蹉路。陰境若現前。瞥爾隨他去。二曰無禪有淨土。萬修萬人去。但得見彌陀。何愁

不開悟。三曰有禪有淨土。猶如戴角虎。現世爲人師。來生作佛祖。四曰無禪無淨土。鐵牀并銅柱。萬劫與千生。沒箇人依怙。建隆二年。忠懿王請住慧日永明寺。賜號智覺禪師。日行一百八事。夜往別峯行道念佛。旁人時聞螺貝天樂之音。忠懿王歎曰。自古求西方者。未有如此精誠專切。乃立西方香巖殿以成其志。所著宗鏡錄百卷。會融諸法。同入心宗。又著萬善同歸集。三卷發明空有性相之旨。提策真修。歸之中道。節錄數條。明乎淨業。一問。論云行道念佛。與坐念佛。功德如何。答。譬如逆水張帆。猶云得往。更加張帆順水。速疾可知。坐念一日。尙乃八十億劫罪消。行念功德。豈知其量。故偈云。行道五百徧。念佛一千聲。事業常如此。西方佛自成。二問。經云觀身實相。觀佛亦然。一念不生。天真頓朗。何得唱他佛號。廣誦餘經。高下輪迴。前後生滅。既妨禪定。但徇音聲。水動珠昏。寧當冥合。答。夫聲爲衆議之府。言皆解脫之門。一切法趣聲。聲爲法界。經云一一諸法中。皆含一切法。故知一言音中。包羅無外。十界具足。三諦理圓。何得非此重彼。離相求真。不窮動靜之源。遂致語默之失。故經云。一念初

起無有初相。是真護念。未必息念消聲。方冥實相。是以莊嚴門內。萬行無虧。真如海中。一毫不捨。且如課念佛號。教有明文。唱一聲而罪滅塵沙。具十念而神棲淨土。拯危拔難。殄障消怨。非但一期暫拔苦津。託此因緣。終投覺海。寶王論云。浴大海者。已用於百川。念佛名者。必成於三昧。亦猶清珠下於濁水。濁水不得不清。佛號投於亂心。亂心不得不佛。既契之後。心佛雙亡。雙照。雙亡。定也。雙照。慧也。定慧既均。亦何心而不佛。何佛而不心。心佛既然。則萬境萬緣。無非三昧也。誰復患之於起心動念。高聲稱佛哉。三問。觸目菩提。舉足皆道。何須別立事相道場。役念勞形。豈諧妙旨。答道場有二。一理道場。二事道場。理道場者。周徧剎塵。事道場者。淨地嚴飾。卽事明理。須假莊嚴。從俗入真。唯憑建立。爲皈依之本。作策發之門。覩相嚴心。自他兼利。上都儀云。夫皈依三寶者。要指方立相。住心取境。不明無相離念也。佛懸知凡夫。繫心尙乃不得。况離相耶。如無術通人。居空造舍也。故直須一心皈依。命盡報精修。坐臥之間。常面西向。當行道禮敬之際。念佛發願之時。懇苦翹勤。無諸異念。如就刑戮。若在狴牢。

怨賊所迫。水火所逼。一心求救。願脫苦輪。速證無生。廣度含識。紹隆三寶。誓報四恩。如斯至誠。方不虛棄。如或言行不稱。信願輕微。無念念相續之心。有數數間斷之意。恃其懈怠。臨終望生。但爲業障所遮。恐難值其善友。風火逼迫。正念不成。何以故。如今是因。臨終是果。應須因實。果則不虛。喻聲和則響順。形直則影端也。四問。卽心是佛。何須外求。若認他塵。自法卽隱。答。諸佛法門。亦不一向。皆有自力他力。自相共相。十玄門之該攝。六相義之融通。隨緣似分。約性常合。從心現境。境卽是心。攝所歸能。他卽是自。經云。非內非外。而內而外。而內故。諸佛解脫於心行中求。而外故。諸佛護念。云何不信外益耶。若禮拜則屈伏無明。深投覺地。致敬之極。如樹倒山崩。業報差別。經云。禮佛一拜。從其膝下至金剛際。一塵。一轉輪王位。獲十種功德也。三藏勒那云。發智清淨禮者。良由達佛境界。慧心明利。了知法界。本無有礙。由我無始順於凡俗。非有有想。非礙礙想。今達自心。虛通無礙。故行禮佛。隨心現量。禮於一佛。卽禮一切佛。禮一切佛。卽是禮一佛。以佛法身。體用融通。故禮一拜。徧通法界。如是香花種

種供養。例同於此。六道四生。同作佛想。文殊云。心不生滅故。敬禮無所觀。內行平等。外順修敬。內外冥合。名平等禮。略引祖教。理事分明。不可滅佛意而毀金文。據偏見而傷圓旨。五問。心外無佛。佛不去來。何有見佛及來迎之事。答。唯心念佛。以唯心觀。徧該萬法。既了境卽心。了心卽佛。故隨所念。無非佛矣。般舟三昧經云。如人夢見七寶。親屬歡喜。覺已追念。不知在何處。如是念佛。此喻唯心所作。卽有而空。故無來去。感應道交。唯心自見。如造罪衆生。感地獄相。皆是唯識罪人惡業心現。並無心外實有銅狗鐵蛇等事。世間一切事法。亦復如是。然遮那佛土。匪局東西。若正解了然。習累俱殄。理量雙備。親證無生。既歷聖階。位居不退。卽不厭生死苦。六道化羣生。如或信心初具。忍力未圓。欲拯沈淪。實難俱濟。無船救溺。弱翅高飛。臥沈疴而欲離良醫。處襁褓而擬拋慈母。久遭沈墜。必死無疑。但得陷己之虞。未有利他之分。故智論云。譬如嬰兒。若不近父母。或墮坑落井。水火等難。渴乳而死。須常近父母。養育長大。方能紹繼家業。初心菩薩。多願生淨土。親近諸佛。增長法身。方能繼佛家業。十方運濟。

有斯益故。多願往生。又按諸經云。生安養者。緣強地勝。福備壽長。蓮華化生。佛親迎接。便登菩薩之位。頓生如來之家。永處跋致之門。盡受菩提之記。身具光明妙相。跡踐寶樹香臺。獻供十方。甯神三昧。觸耳常聞大乘之法。差肩皆隣補處之人。念念虛玄。心心靜慮。煩惱燄滅。愛欲泉枯。尙無惡道之名。豈有輪迴之事。安國鈔云。所言極樂者。有二十四種樂。羣疑論云。西方淨土有三十種益。文繁不引故釋迦本師殷勤勸往。十方諸佛。廣舌證明。豈可不足信歟。六問。龐居士云。事上說佛國。此去十萬億。大海渺無邊。動卽黑風起。往者雖千萬。達者無一二。忽遇本來人。不在因緣裏。云何通會而證往生答。若提宗考本。尙不說有佛有土。豈言達與不達乎。所以天真自具。不涉因緣。匪動絲毫。常冥真體。若約事論。故非一等。九品往生。上下俱達。或遊化國。見佛應身。或生報土。覩佛真體。或一夕而便登上地。或經劫而方證小乘。或利鈍根。或定散意。或道悟遲速。根機不同。或華開早晚。時限有異。今古具載。凡聖俱生。行相昭然。明證自驗。故佛親記文殊。當生阿彌陀佛土。位登初地。無量壽經云。彌勒菩薩問佛。

未知此界。有幾許不退菩薩。得生彼國。佛言此娑婆世界。有六十七億。不退菩薩。皆得往生。不退菩薩。尚願往生。况凡夫乎。佛梵音聲。豈虛誑哉。七問。但見性悟道。便超生死。何用繫念彼佛。求生他土。答。眞修行人。應自審察。如人飲水。冷暖自知。今存龜鑑。以破多惑。諸仁者。當觀自己行解。見性悟道。受如來記。紹祖師位。能如馬鳴龍樹否。得無礙辯才。證法華三昧。能如天台智者否。宗說皆通。行解兼修。能如忠國師否。此諸大士。皆明垂言教。深勸往生。蓋是自利利他。豈肯誤人自誤。况大雄讚歎。金口叮嚀。希從昔賢。恭稟佛敕。定不謬誤也。如往生傳所載。古今高士事蹟。顯著非一。宜勤觀覽。以自照知。又當自度。臨終之時。生死去住。定得自在否。自無始來。惡業重障。定不現前否。此一報身。定脫輪迴否。三途惡道。異類中行。出沒自由。定無苦惱否。天上人間。十方世界。隨意寄託。定無滯礙否。若也了了自信。得及何善。如之。若其未也。莫以一時貢高。卻致永劫沈淪。自失善利。將復尤誰。嗚呼哀哉。何嗟及矣。何乃愛河浪底。沈溺無憂。火宅燄中。焚燒不懼。密織癡網。淺智之刃。莫能揮。深種疑根。泛信之

力焉。能拔。遂卽甘心伏意。幸禍樂災。卻非清淨之邦。願戀恐畏之世。焦蛾爛繭。自處餘殃。籠鳥鼎魚。翻稱快樂。故知佛力不如業力。邪因難趣正因。且未脫業身。終縈三障。既不愛蓮臺化質。應須向胎藏稟形。若受肉身。全身是苦。既沈三界。寧免輪迴。今於入苦之中。略標生死二苦。一生苦者。攬精血爲體。處生熟藏中。四十二變而成幻質。上壓穢食。下熏臭坑。飲冷若冰河。吞熟如鑪炭。宛轉迷悶。不可具言。及至生時。衆苦無量。觸手墮地。如活剝牛皮。逼窄艱難。似生脫龜殼。銜怨抱恨。擬害母身。纔觸熱風。苦緣頓忘。嬰兒癡騃。水火橫亡。脫得成人。有營身種。業田旣熟。愛水頻滋。無明發生。苦芽增長。膠粘七識。籠罩九居。如旋火輪。循環莫已。二死苦者。風刀解生。火大燒體。聲虛內顫。魄悸魂驚。極苦併生。惡業頓現。千愁鬱悒。萬怖惶惶。乃至命謝氣終。寂然孤逝。幽途黯黯。冥路茫茫。與昔怨讐。皎然相對。號天扣地。求脫無門。隨業淺深。而歷諸趣。或倒生地獄。或陰受鬼形。忍饑渴而長劫號咷。受罪苦而徧身焦爛。未脫二十五有。善惡之業靡亡。追身受報。未曾遺失。生死海關。業道難窮。聲聞尙味出胎。菩

薩猶昏隔陰。况具縛生死。底下凡夫。甯不被生苦所羈。死魔所繫。故目連所問經云。佛告目連。譬如萬川長注。有浮草木。前不顧後。後不顧前。都會大海。世間亦爾。雖有豪貴富樂自在。悉不得免生老病死。祇由不信佛經。後世爲人。更深困劇。不能得生千佛國土。是故我說無量壽佛國土。易往易取。而人不能修行往生。反事九十六種邪道。我說是人名無眼人。名無耳人。又大集月藏經云。我末法時中。億億衆生起行修道。未有一得者。當今末法。現是五濁惡世。唯有淨土一門。可通入路。當知自行難圓。他力易就。如劣土附輪王之勢。飛遊四天。凡質託仙藥之功。昇騰三島。實爲易行之道。疾得相應。慈旨叮嚀。須銘肌骨。居永明十五年。弟子千七百人。常與衆受菩薩戒。施食放生。悉皆回向淨土。開寶八年二月二十六日。晨起焚香告衆。趺坐而化。年七十二。後有僧來自臨川。經年繞其塔。人問故。曰。我病入冥。見殿左供一僧像。王勤禮拜。因詢之曰。此杭州永明壽禪師也。已經往生西方上上品矣。王重其德。故禮敬耳。崇甯中。追諡宗照禪師。本朝世宗憲皇帝。加封妙圓正修智覺禪師。

宗蓮七祖

師諱省常。字造微。姓顏。錢塘人。七歲出家。十七進具。宋淳化中。住南昭慶。慕廬山之風。謀結蓮社。因刻無量壽佛像。刺血書華嚴淨行品。於是易蓮社爲淨行社。一時公卿大夫之預會者。百二十人。皆稱淨行弟子。王文正公且爲之首。比丘千人焉。翰林蘇易簡。作淨行品序。至謂予當布髮以承其足。剗身以請其法。猶尙不辭。况陋文淺學而有惜哉。然師才辯勝人。律嚴超常。領衆行道。日夜精勤。畢此一形。期生安養。天禧四年正月十二日。於寺端坐念佛。有頃。厲聲唱曰。佛來也。泊然而化。衆見地色皆金。移時方隱。年六十二。弟子奉全身建塔於烏窠禪師之側。號圓淨法師。

蓮宗八祖

師諱祿宏。字佛慧。號蓮池。古杭仁和人。俗姓沈氏。世爲名族。父德鑑。號明齋先生。母周氏。師生而穎異。年十七。補諸生。以學行稱。忽悟生死事大。自此棲心淨土。戒殺生。祭必素。娶婦張氏。生一子。殤。頃婦亦亡。母強之。續納湯氏。然師意非欲也。年三十一。

父母俱喪。因泣曰。罔極之恩。正吾報答時矣。乃作七筆勾詞。棄家。投西山。性天和尙。祝髮。乞昭慶玉律師受具。於是杖策遊方。徧參知識。過東昌。忽有悟。隆慶五年。乞食雲棲。見山水幽絕。結茅居焉。山故多虎。爲放瑜伽噉口。虎不爲患。時歲亢旱。居民乞禱雨。目唯唱佛名。雨隨注。衆悅。相與庀材造屋。衲子日歸。遂成叢席。所設門庭。專修淨業。外嚴淨毗尼。尊崇講誦。明因果。識罪福。整飭清規。眞修實行。凡所謂欺世盜名者。無可施其伎倆。世皆謂祖祇宏淨土。而不知末法中之普光明藏也。嘗著淨土疑辯一篇。誠醒狂禪之痛策也。文云。或問淨土之說。蓋表法耳。智人宜直悟禪宗。而今只管讚說淨土。將無執著事相。不明理性。答。歸元性無二。方便有多門。曉得此意。禪宗淨土。殊途同歸。子之所疑。當下冰釋。昔人於此。遞互闡揚。不一而足。如中峯大師道。禪者淨土之禪。淨土者禪之淨土。而修之者。必貴一門深入。此數語尤萬世不易之定論也。故大勢至菩薩得念佛三昧。而曰以念佛心。入無生忍。普賢菩薩入華嚴不思議解脫。而曰願命終時。生安樂刹。是二大士。一侍娑婆教主。一侍安養導師。宜

應各立門戶。而乃和會圓融。兩不相礙。此皆人所常聞習知。那得尙執偏見。且爾云淨土法表者。豈不以淨心卽是淨土。豈復更有七寶世界。則亦將謂善心卽是天堂。豈復更有夜摩忉利。惡心卽是地獄。豈復更有刀劍鑊湯。愚癡卽是畜生。豈復更有披毛戴角等耶。又爾喜談理性。厭說事相。都緣要顯我是高流。怕人說我不通理性。噫。若真是理性洞明。便知事外無理。相外無性。本自交徹。何須定要捨事求理。離相覓性。况土分四種。佛有三身。汝謂只有寂光土。更無寶報莊嚴等土乎哉。若一味說無相話以爲高。則資性稍利者。看得兩本經論。記得幾則公案。卽便能之。何足爲難。且汝旣了徹自心。隨處淨土。吾試問汝。還肯卽廁溷中作住止否。還肯就犬豕牛馬同槽而飲噉否。還肯洗摩飼哺伽摩羅疾。膿血屎尿諸惡疾人。積年累月否。於此數者。歡喜安隱。略不介意。許汝說高山平地。總西方。其或外爲忍勉。內起疑嫌。則是淨穢之境仍分。憎愛之情尙在。而乃開口高談大聖人過量境界。撥無佛國。蔑視往生。可謂欺天誑人。甘心自昧。苦哉苦哉。又汝若有大力量。有大誓願。願於生死海中。頭

出頭沒。行菩薩行。更無畏却。則淨土之生。吾不汝強。如或慮此土境風浩大。作主不得。慮諸佛出世難值。修學無由。慮忍力未固。不能於三界險處。度脫衆生。慮盡此報身。未能永斷生死。不受後有。慮後有既在。捨身受身。前路茫茫。未知攸往。則棄淨土而不生。其失非細。淨土法門。似淺而深。似近而遠。似難而易。似易而難。他日汝當自知。汝今參禪念佛。不妨隨便一門深入。但忌認鑰作金。得少爲足。便以管窺小解。恣意妄談。非詆淨土。喻如癡狂之子。罵斥父母。父母慈憐。雖不加責。其如天理之不容。王法之必戮何。彼妄談者。報亦如是。可懼也夫。可悲也夫。深嗟吾人。生死關頭。最難明白。古云。聲聞尙昧出胎。菩薩猶昏隔陰。予初疑聲聞已具六通。菩薩雙修定慧。何由昏昧。均未能免。及考之自己。稽之他人。昨宵之事。平旦忽爾茫然。况隔陰乎。乍遷一房。夜起不知南北。况出胎乎。彼諸賢聖之昏昧。蓋暫昏而卽明。俄昧而漸覺者也。而我等凡夫。則終於昏昧。而不自知也。捨身受身。利害有如此者。爲今之計。直須堅凝正心。毋使剎那失照。而復懇苦虔誠。求生淨土。生淨土則昏昧不足慮矣。既放其

心復撥淨土。危乎傷哉。今人多好說參悟。好說了生死。不知在此土了悟甚難。謂之豎超三界。斯陀含猶一往一來。况凡夫乎。此土衆生。多是先生西方。然後了悟。生西方一門。謂之橫超三界。萬無一失。如上所說。誠可謂剖心之語。徹骨之談。不但令淺學之人信而有勇。又可使深悟之士。事理圓彰。所著雲棲法彙一書。真度世之寶筏。法門之柱石。其彌陀疏鈔。闡發事理一心。至爲淵奧。自蓮宗建立以來。未曾有也。嘉言偉績。備載全書。譬夫龍宮之寶。難以指陳。但好學之士。所宜捧讀而領會者矣。蓮祖開法四十餘年。道播寰宇。從其化者甚衆。萬歷四十三年。六月杪。入城。別諸故舊。七月朔晚。入堂。曰。明日吾行矣。次夕入丈室。示微疾。瞑目坐。城中諸弟子畢至。復開目。曰。大衆老實念佛。莫捏怪。莫壞我規矩。向西稱佛名而逝。祖生於嘉靖十四年正月二十二日。示寂於萬歷四十三年七月初二日。僧臘五十。世壽八十有一。得度弟子廣孝等。并及門受戒者。不下數千計。縉紳士君子及門者。亦以千計。本年八月二十三日。入塔於寶刀巖之陽。卽五雲之麓也。

蓮宗九祖

師諱智旭。字藕益。號西有。姓鍾。吳縣人。父持白衣大悲呪。夢大士送子而生。師少以聖學自任。著書闢佛。凡數千言。及閱雲棲竹窗隨筆。乃焚所著論。年二十。讀地藏本願經。發出世志。日誦佛名。天啓元年。年二十四。聽一法師講經。疑情忽發。用心參究。已而豁然。尋掩關於吳江。遇疾且殆。始一意求生淨土。疾少閒。結壇持往生呪七日。說偈曰。稽首無量壽。拔業障根本。觀世音勢至。海衆菩薩僧。我迷本智光。妄墮輪迴苦。曠劫不暫停。無救無歸趣。劣得此人身。仍遭劫濁亂。雖復預僧倫。未入法流水。目擊法輪壞。欲挽力未能。良由無始世。不植勝善根。今以決定心。求生極樂土。乘我本誓船。廣度沈淪衆。我若不往生。不能滿所願。是故於娑婆。畢定應舍離。猶如被溺人。先求疾到岸。乃以方便力。悉拯暴流人。我以至誠心。深心回向心。然臂香三炷。結一七淨壇。專持往生呪。惟除食睡時。以此功德力。求決生安養。我若退初心。不向西方者。寧卽墮泥犁。令疾生改悔。誓不戀人天。及以無爲處。仰願大威神力。無畏不共。三

寶無邊德。加被智旭等。折伏使不退。攝受令增長。其後歷住溫陵。漳州。石城。晟溪。長水。新安。廣宏。台教。而歸老於靈峯。時諸方禪者。多以淨土爲權教。遇念佛人。必令參究誰字。師獨謂持名一法。卽是圓頓心宗。有卓左車者。嘗設問言。如何是念佛門中向上一路。如何得離四句絕百非。如何是念佛人最後極則。如何是淆譌處腦後一鎚。冀和尙將向來自性彌陀。唯心淨土等語。撇向一邊。親見如來境界。快說一番。震動大千世界。師答言。向上一著。非禪非淨。卽禪卽淨。才言參究。已是曲爲下根。果大丈夫。自應諦信。是心作佛。是心是佛。設一念與佛有隔。不名念佛三昧。若念念與佛無間。何勞更問阿誰。淨土極則事。無念外之佛。爲念所念。無佛外之念。能念於佛。正下手時。便不落四句百非。通身拶入。但見阿彌陀佛一毛孔光。卽見十方無量諸佛。但生西方極樂一佛國土。卽生十方諸佛淨土。此是向上一路。若捨現前彌陀。別言自性彌陀。捨西方淨土。別言唯心淨土。此是淆譌公案。經云三賢十聖住果報。唯佛一人居淨土。此是腦後一鎚。但能深信此門。依信起願。依願起行。則念念流出無量。

如來。偏坐十方微塵國土。轉大法輪。照古照今。非爲分外。何止震動大千世界。又嘗示人云。夫念佛法門。別無奇特。只是深信力行爲要耳。佛云。若人專念阿彌陀。是名無上深妙禪。天台云。四種三昧。同名念佛。念佛三昧。名爲三昧中王。雲棲云。一句阿彌陀佛。該羅八教。圓攝五宗。可惜如今人。將念佛看做淺近勾當。謂愚夫愚婦工夫。所以信既不深。行亦不力。終日悠悠。淨功莫尅。或有巧設方便。欲深明此念佛三昧者。動以參究誰字爲向上。殊不知一念現前之心。本是離句絕非。不消作意離絕。卽現前一句所念之佛。亦本超情離見。何勞說妙說玄。只貴信得及。守得穩。直念下去。或晝夜十萬。或五萬三萬。以決定不缺爲準。畢此一生。誓無改變。而不得往生者。三世諸佛便爲誑語。一得往生。則永無退轉。種種法門。悉得現前。切忌今日張三。明日李四。遇著教下人。又思尋章摘句。遇著宗門人。又思參究問答。遇著持律人。又思搭衣用鉢。此則頭頭不了。帳帳不清。豈知念得阿彌陀佛熟。三藏十二部極則教理。都在裏許。千七百公案。向上機關。亦在裏許。三千威儀。八萬細行。三聚淨戒。亦在裏許。

眞能念佛。放下身心世界。卽大布施。眞能念佛。不復起貪瞋癡。卽大持戒。眞能念佛。不計是非人我。卽大忍辱。眞能念佛。不稍間斷夾雜。卽大精進。眞能念佛。不妄想馳逐。卽大禪定。眞能念佛。不爲他岐所惑。卽大智慧。試自簡點。若於身心世界。猶未放下。貪瞋癡念。猶自現在。是非人我。猶自挂懷。間斷夾雜。猶未除盡。妄想馳逐。猶未永滅。種種他岐。猶能惑志。便不名爲眞念佛也。要到一心不亂境界。亦無他術。最初下手。須用數珠。記得分明。刻定課程。決定無缺。久久純熟。不念自念。然後記數亦得。不記數亦得。若初心便要說好看話。要不著相。要學圓融自在。總是信不深。行不力。饒你講得十二分教。下得千七百公案。皆是生死岸邊事。臨命終時。決然用不著。又云。若欲速脫輪迴之苦。莫如持名念佛。求生極樂世界。若欲決定得生極樂世界。又莫如以信爲前導。願爲後鞭。信得決。願得切。雖散心念佛。亦得往生。信不眞。願不猛。雖一心不亂。亦不得生。云何爲信。一者信阿彌陀佛願力。二者信釋迦文佛教語。三者信六方諸佛讚歎。夫世間正人君子。便無妄語。況彌陀釋迦。六方諸佛。豈有妄語。此

而不信。真不可救。故須先生深信。勿起疑惑。云何爲願。一切時中厭惡娑婆生死之苦。欣慕淨土菩提之樂。隨有所作若善若惡。善則迴向求生。惡則懺願求生。更無二志。是名爲願。信願既具。則念佛方爲正行。改惡修善。皆爲助行。隨功力之淺深。以分九品四土。纖毫不濫。只須自己簡察。不必旁問他人。謂深信切願念佛。而念佛時心多散亂者。卽是下品下生。深信切願念佛。而念佛時散亂漸少者。卽是下品中生。深信切願念佛。而念佛時便不散亂者。卽是下品上生。念到事一心不亂。不起貪瞋癡者。卽是中三品生。念到理一心不亂。任運先斷見思塵沙。亦能伏斷無明者。卽是上三品生。故信願持名者。能歷九品。的確不謬也。故云得生與否。全由信願之有無。品位高下。全由持命之深淺。又信願持名。消伏業障。帶惑往生。卽是凡聖同居淨土。信願持名。見思斷盡而往生者。卽是方便有餘淨土。信願持名。豁破一分無明而往生者。卽是實報莊嚴淨土。信願持名。持到究竟之處。無明斷盡而往生者。卽是常寂光淨土。故持名能淨四土。亦的確不謬也。問曰。如何持名能斷無明。答曰。所持之佛名。

無論悟與不悟。無非一境三諦。能持之念心。無論達與不達。無非一心三觀。只爲衆生妄想執著。情見分別。所以不契圓常。殊不知能持者。卽是始覺。所持者。卽是本覺。今直下持去。持外無佛。佛外無持。能所不二。則始覺合乎本覺。名究竟覺矣。問曰。旣始覺合本。則當下卽常寂光。如何亦說往生。答曰。若達當下卽常寂光。又何妨說箇往生。說往卽往。非往而往。生卽無生。無生而生。文殊善財之生西方者。此也。咄哉男子。無措思惟。伏願緇素智愚。於此簡易直捷。無上圓頓法門。勿視爲難。而輒生退諉。勿視爲易。而漫不策勤。勿視爲淺。而妄致藐輕。勿視爲深。而不敢承任。蓋所持之名號。眞實不可思議。能持之心性。亦眞實不可思議。持一聲則一聲。不可思議。持千百千萬。無量無數聲。聲聲皆不可思議也。順治十年冬。有疾。遺命闍維後。屑骨和粉。分施禽魚。結西方緣。明年正月二十一日。晨起。病良已。午刻跌坐繩牀。向西稱佛。舉手而逝。年五十七。旣寂二年。如法闍維。啓龕。髮長覆耳。面貌如生。門人不忍從遺命。收其靈骨。建塔於靈峯。所著四十多種。俱行于世。內有選定淨土十要一書。凡修淨

業者不可不閱也。

蓮宗十祖

師諱寶賢。字思齊。號省庵。常熟時氏子。世業儒。師生卽不苟葷。甫總角時。有出塵志。父早喪。母張氏。知其夙具善根。命爲釋氏子。七歲禮清涼庵容選和尚爲師。聰慧爽朗。經典過目不忘。十五薙染。兼通世典。能詩善書法。前輩錢玉友。許暘谷。皆執節與交。然未嘗頃刻忘生死大事也。性篤孝。母亡。跪佛前諷報恩經七七。日。歲時伏臘。必設像修供。他日至普仁寺。見一僧死仆地。師瞿然悟世無常。益加鞭策。年二十四。圓尸羅於昭慶。嚴習毘尼。不離衣鉢。日止一食。脅不帖席。率以爲常。庚寅。依渠成法師。聽講法華圓義。謁紹曇法師。聽唯識。楞嚴。止觀諸部。晝夜研窮。未三夏。三觀十乘之旨。性相之學。靡不通貫。曇師卽授記。薊。傳靈峯四世。天台正宗焉。甲午。叩靈鷲和尚於崇福。參向上事。四月。恍然契悟。曰。我夢覺矣。自是應機無礙。才辯縱橫。鶩欲付以衣拂。弗受辭去。遂禁足於眞寂寺。日閱三藏梵筴。夕持西方佛名。三年期滿。寺衆請

講法華。師升座開演。河懸泉湧。沛然莫禦。戊戌首春。止杭之隆興寺。紹曇法師。命師代講經律。每擊節稱善。己亥春。詣四明阿育王山。瞻禮舍利。先後五然指香供佛。跪佛前發四十八願。感舍利放光。因作詩云。迦文滅度二千年。舍利於今尙燦然。自慶宿生何善利。得瞻光相塔門前。一顆如珠綴小鍾。青黃赤白現何窮。自心還見自心相。不是如來色不同。殿含寶塔塔含空。塵塵刹刹本自融。八萬非多一非少。毫端應現寶王宮。醫王雖去藥還留。慚愧癡兒病未瘳。讀罷涅槃遺教品。傷心不覺淚長流。是以每年佛涅槃日。大合緇白。廣修供養。講演彌陀遺教二經。示是心是佛之旨。三根普攝。法化洋溢。江浙黑白。傾心皈仰。作勸發菩提心文。激厲四衆。其言最爲痛切。誦者多爲淚下。如是者歷有十載。法筵之盛。甲於諸方。又嘗應永福。普慶。海雲諸禪席。每進院。模範一新。清規肅穆。日講法華楞嚴諸部。執經問義者。翕集座下。未幾。退隱杭城仙林寺。不出戶庭。力修淨業。己酉冬。杭人茅靜遠。葉陞。皇甫子儀。李執玉。監院師省躬。一輩等。請主鳳山梵天講寺。於是屏絕諸緣。純提淨土。結長期。嚴立規約。

晝夜六時。領衆行道。互相策勵。人皆謂永明再來也。先後主刹十餘載。得度弟子。洎乞戒。皈依者。凡數百人。間有學詩文者。師痛誠曰。人命在呼吸間。那有閒工夫。學世諦文字。稍有錯過。便成他世。欲望出離。難矣哉。雍正十一年癸丑。臘月佛成道日。謂弟子曰。我於明年四月十四日長往矣。自此掩關寸香齋。限晝夜課佛十萬聲。明年甲寅四月二日出關。十二告衆曰。我十日前見西方三聖降臨虛空。今再見矣。吾其生淨土乎。隨囑咐院事。徧辭城中諸外護。侍者以偈請。師書云。身在華中佛現前。佛光來照紫金蓮。心隨諸佛往生去。無去來中事宛然。書訖曰。吾十四日定往生矣。爾等爲我集衆念佛。十三早斷飲食。斂着危坐。五更具浴更衣。面西趺坐。至巳時。遠近畢集。雪涕膜拜曰。願師住世度人。師復開目曰。吾去卽來。生死事大。各自淨心念佛可矣。言訖。合掌連稱佛名而逝。少頃。鼻筋下垂。顏色明潤。迄封龕。色不變。虞山上首無住師。以是歲臘月八日。奉靈骨塔于常熟琴川拂水巖之西。乾隆七年二月十五日。鄧山諸緇素。懷師道行。迎骨去。重建塔於阿育王寺之右。其舊塔以藏衣鉢云。師

生於康熙二十五年八月初八日。示寂於雍正十二年四月十四日。世壽四十九。僧臘二十五。刻有省庵法師語錄一冊。略備始終。乃二林彭際清居士重訂本。刊板行世。讀者得益。妙難盡述。今錄其勸發菩提心文。以期閱者。咸修淨業。同生西方。文云。不肖愚下。凡夫僧實賢。泣血稽顙。哀告現前大衆。及當世淨信男女等。唯願慈悲。少加聽察。嘗聲入道要門。發心爲首。修行急務。立願居先。願立則衆生可度。心發則佛道堪成。苟不發廣大心。立堅固願。則縱經塵劫。依然還在輪回。雖有修行。總是徒勞辛苦。故華嚴經云。忘失菩提心。修諸善法。是名魔業。忘失尙爾。况未發乎。故知欲學如來乘。必先具發菩薩願。不可緩也。然心願差別。其相乃多。若不指陳。如何趣向。今爲大衆。略而言之。相有其八。所謂邪正真僞大小偏圓是也。云何名爲邪正真僞大小偏圓耶。世有行人。一向修行。不究自心。但知外務。或求利養。或好名聞。或貪現世欲樂。或望未來果報。如是發心。名之爲邪。既不求利養名聞。又不貪欲樂果報。唯爲生死。爲善提。如是發心。名之爲正。念念上求佛道。心心下化衆生。聞佛道長遠。不生

退怯。觀衆生難度。不生厭倦。如登萬仞之山。必窮其頂。如上九層之塔。必造其顛。如是發心。名之爲正。有罪不懺。有過不除。內濁外清。始勤終怠。雖有好心。多爲名利之所夾雜。雖有善法。復爲罪業之所染汚。如是發心。名之爲僞。衆生界盡。我願方盡。菩提道成。我願方成。如是發心。名之爲大。觀三界如牢獄。視生死如怨家。但期自度。不欲度人。如是發心。名之爲小。若於心外見有衆生。及以佛道。願度願成。功勳不忘。知見不泯。如是發心。名之爲偏。若知自性是衆生。故願度脫。自性是佛道。故願成就。不見一法離心別有。以虛空之心。發虛空之願。行虛空之行。證虛空之果。亦無虛空之相可得。如是發心。名之爲圓。知此八種差別。則知審察。知審察。則知去取。知去取。則可發心。云何審察。謂我所發心。於此八中。爲邪爲正。爲真爲僞。爲大爲小。爲偏爲圓。云何去取。所謂去邪去僞。去小去偏。取正取真。取大取圓。如此發心。方得名爲真正發善提心也。此菩提心。諸善中王。必有因緣。方得發起。今言因緣。略有十因。何等爲十。一者念佛重恩故。二者念父母恩故。三者念師長恩故。四者念施主恩故。五者念

衆生恩故。六者念生死苦故。七者尊重己靈故。八者懺悔業障故。九者求生淨土故。十者爲令正法得久住故。云何念佛重恩。謂我釋迦如來最初發心。爲我等故。行菩薩道。經無量劫。備受諸苦。我造業時。佛則哀憐。方便教化。而我愚癡。不知信受。我墮地獄。佛復悲痛。欲代我苦。而我業重。不能救拔。我生人道。佛以方便。令種善根。世世生生。隨逐於我。心無暫捨。佛初出世。我尙沈淪。今得人生。佛已滅度。何罪而生末法。何福而預出家。何障而不見金身。何幸而躬逢舍利。如是思惟。向使不種善根。何以得聞佛法。不聞佛法。焉知常受佛恩。此恩此德。邱山難喻。自非發廣大心。行菩薩道。建立佛法。救度衆生。縱使粉骨碎身。豈能酬答。是爲發菩提心第一因緣也。云何念父母恩。哀父母。生我劬勞。十月三年。懷胎乳哺。推乾去濕。嚙苦吐甘。才得成人。指望紹繼門風。供奉祭祀。今我等旣已出家。濫稱釋子。忝號沙門。甘旨不供。祭掃不給。生不能養其口體。死不能導其神靈。於世間則爲大損。於出世又無實益。兩途旣失。重罪難逃。如是思惟。唯有百劫千生。常行佛道。十方三世。普度衆生。則不唯一生父

母。生生父母俱蒙拔濟。不唯一人父母。人人父母盡可超昇。是爲發善提心第三因緣也。云何念師長恩。父母雖能生育我身。若無世閒師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等粗知禮義。略解佛法。袈裟被體。戒品沾身。此之重恩。從師長得。若求小果。僅能自利。今爲大乘。普願利人。則世出世閒二種師長。俱蒙利益。是爲發善提心第三因緣也。云何念施主恩。謂我等今者日用所資。並非己有。三時粥飯。四季衣裳。疾病所須。身口所費。此皆出自他力。將爲我用。彼則竭力躬耕。尙雖餬口。我則安坐受食。猶不稱心。彼則紡織不已。猶自艱難。我於安服有餘。甯知愛惜。彼則華門蓬戶。擾攘終身。我則廣宇閒庭。優游卒歲。以彼勞而供我逸。於心安乎。將他利而潤己身。於理順乎。自非悲智雙運。福慧二嚴。檀信沾恩。衆生受賜。則粒米寸絲。酬償有分。惡報難逃。是爲發善提心第四因緣也。云何念衆生恩。謂我與衆生。從曠劫來。世世生生。互爲父母。彼此有恩。今雖隔世昏迷。互不相識。以理推之。豈無報效。今之披毛戴角。安知非昔爲其子乎。今

之蟬動娟飛。安之不曾爲我父乎。每見幼離父母。長而容貌都忘。何況宿世親緣。今則張王難記。彼其號呼於地獄之下。宛轉於餓鬼之中。苦痛誰知。飢虛安訴。我雖不見不聞。彼必求拯求濟。非經不能陳此事。非佛不能道此言。彼邪見人。何足以知此。是故善薩觀於螻蟻。皆是過去父母。未來諸佛。常思利益。念報其恩。是爲發善提心。第五因緣也。云何念生死苦。謂我與衆生從曠劫來。常在生死。未得解脫。人間天上。此界他方。出沒萬端。昇沈片刻。俄焉而天。俄焉而人。俄焉而地獄。畜生餓鬼。黑門朝出而暮還。鐵窟暫離而又入。登刀山也。則舉體無完膚。攀劍樹也。則方寸皆割裂。熱鐵不除飢。吞之則肝腸盡爛。洋銅難療渴。飲之則骨肉都靡。利鋸解之。則斷而復續。巧風吹之。則死已還生。猛火城中。忍聽叫嗥之慘。煎熬盤裏。但聞苦痛之聲。冰凍始凝。則狀似青蓮藥結。血肉既裂。則身如紅藕華開。一夜死生。地下每經萬徧。一朝苦痛。人間已過百年。頻煩獄卒疲勞。誰信閻翁教誡。受時知苦。雖悔恨以何追。脫已還忘。其作業也如故。鞭驢出血。誰知吾母之悲。牽豕就屠。焉識乃翁之痛。食其子而不

知。文王尙爾。噉其親而未識。凡類皆然。當年恩愛。今作怨家。昔日寇讐。今成骨肉。昔爲母而今爲婦。舊是翁而新作夫。宿命知之。則可羞可恥。天眼視之。則可笑可憐。糞穢叢中。十月包藏難過。膿血道理。一時倒下可憐。少也何知。東西莫辨。長而有識。貪欲便生。須臾而老病相尋。迅速而無常。又至。風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也猶易。神之欲謝。其去體也倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計別離之淚。峨峨積骨。過彼崇山。莽莽橫尸。多於大地。向使不聞佛語。此事誰見誰聞。未覩佛經。此理焉知焉覺。其或依前貪戀。仍舊癡迷。祇恐萬劫千生。一錯百錯。人身難得而易失。良時易往而難追。道路冥冥。別離長久。三途惡報。還自受之。痛不可言。誰當相代。輿言及此。能不寒心。是故宜應斷生死流。出愛欲海。自他兼濟。彼岸同登。曠劫殊勛。在此一舉。是爲發菩提心第一。六因緣也。云何尊重已靈。謂我現前一心。直下與釋迦如來無二無別。云何世尊無

量劫來。早成正覺。而我等昏迷顛倒。尙做凡夫。又佛世尊。則具有無量神通智慧。功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可恥。譬如無價寶珠。沒在淤泥。視同瓦礫。不加愛重。是故宜應以無量善法。對治煩惱。修德有功。則性德方顯。如珠被濯。懸在高幢。洞達光明。映蔽一切。可謂不孤佛化。不負己靈。是爲發菩提心第七因緣也。云何懺悔業障。經言犯一吉羅。如四天王壽五百歲。墮泥犂中。吉羅小罪。尙獲此報。何況重罪。其報難言。今我等日用之中。一舉一動。恆違戒律。一殮一水。頻犯尸羅。一日所犯。亦應無量。何況終身歷劫。所起之罪。更不可言矣。且以五戒言之。十人九犯。少露多藏。五戒名爲優婆塞戒。尙不具足。何況沙彌比丘菩薩等戒。又不必言矣。問其名。則曰我比丘也。問其實。則尙不足爲優婆塞也。豈不可愧哉。當知佛戒不受則已。受則不可毀犯。不犯則已。犯則終必墮落。若非自慙慙他。自傷傷他。身口併切。聲淚俱下。普與衆生。求哀懺悔。則千生萬劫。惡報難逃。是爲發菩提心第八因緣也。云何求生淨土。謂在此土修行。其進道也難。

彼土往生。其成佛也易。易故一生可致。難故累劫未成。是以往聖前賢。人人趣向。千經萬論。處處指歸。末世修行。無越於此。然經稱少善不生。多福乃至。言多福。則莫若執持名號。言多善。則莫若發廣大心。是以暫持聖號。勝於布施百年。一發大心。超過修行歷劫。蓋念佛本期作佛。大心不發。則雖念奚爲。發心爲原修行。淨土不生。則發雖易退。是則下菩提種。耕以念佛之犁。道果自然增長。乘大願船。入於淨土之海。西方決定往生。是爲發菩提心第九因緣也。云何令正法久住。謂我世尊無量劫來。爲我等故。修菩薩道。難行能行。難忍能忍。因圓果滿。遂致成佛。既成佛已。化緣周訖。入於涅槃。正法像法。皆已滅盡。僅存末法。有教無人。邪正不分。是非莫辨。競爭人我。盡逐利名。舉目滔滔。天下皆是。不知佛是何人。法是何義。僧是何名。衰殘至此。殆不忍言。每一思及。不覺淚下。我爲佛子。不能報恩。內無益於己。外無益於人。生無益於時。死無益於後。天雖高不能覆我。地雖厚不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回末運於此時。決當圖護持正法於來

世。是故偕諸善友。同到道場。述爲懺摩。建茲法會。發四十八之大願。願願度生。期百千劫之深心。心心作佛。從於今日。盡未來際。畢此一形。誓歸安養。既登九品。同入娑婆。俾得佛日重輝。法門再闡。僧海澄清於此界。人民被化於東方。劫運爲之更延。正法得於久住。此則區區真實苦心。是爲菩提心第十因緣也。如是十緣備識。八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。况今我等又得出家。又受具戒。又遇道場。又聞佛法。又瞻舍利。又修懺法。又值善友。又具勝緣。不於今日發此大心。更待何日。唯願大衆。愍我愚誠。憐我苦志。同立此願。同發是心。未發者今發。已發者增長。已增長者今令相續。勿畏難而退怯。勿視易而輕浮。勿欲速而不久長。勿懈怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任自其枯。因鈍弗磨。置之無用。又若以修行爲苦。則不知懈怠尤苦。修行則勤勞暫時。安樂永劫。懈怠則偷安一世。受苦

多生。况乎以淨土爲舟航。則何愁退轉。又得無生爲忍力。則何慮艱難。當知地獄罪人。尙發菩提於往劫。豈可人倫佛子。不立大願於今生。無始昏迷。往者既不可諫。而今覺悟。將來猶尙可追。然迷而未悟。固可哀憐。苟知而不行。尤爲痛惜。若懼地獄之苦。則精進自生。若念無常之速。則懈怠不起。又須以佛法爲鞭策。善友爲提攜。造次弗離。終身依賴。則無退失之虞矣。勿言一念輕微。勿謂虛願無益。心真則事實。願廣則行深。虛空非大。心王爲大。金剛非堅。願方最堅。大衆誠能不棄我語。則菩提眷屬。從此聯姻。蓮社宗盟。自今締好。所願同生淨土。同見彌陀。同化衆生。同成正覺。則安知未來三十二相。百福莊嚴。不從今日發心立願而始也。願與大衆共勉之。則幸甚。

蓮宗十一祖

師諱醒際。字徹悟。一字訥堂。又號夢東。京東豐潤縣人。俗姓馬。父諱萬璋。母高氏。師幼靡穎異。長喜讀書。經史羣籍。靡弗采覽。二十二歲。因大病。悟幻質無常。發出世志。病已。至房山縣。投三聖庵。榮池老宿薙髮。越明年。詣岫雲寺。恆律實師圓具。次年聞

香界寺隆一法師。開演圓覺。師預會焉。晨夕研詰。精求奧義。遂悟圓覺全經大旨。復
依增壽寺慧岸法師。聽講相宗。妙得其要。後歷心華寺徧空法師座下。聽法華楞嚴
金剛等經。圓解頓開。於性相二宗。三觀十乘之旨。了無滯礙。乾隆三十三年冬。參廣
通粹如純翁。明向上事。師資造合。乃印心焉。是爲臨濟三十六世。磐石七世也。三十
八年。粹翁遷主萬壽寺。師繼席廣通。率衆參禪。策勵後學。津津不倦。十四年如一日。
聲馳南北。宗風大振。每憶永明延壽禪師。乃禪門宗匠。尙歸心淨土。日課十萬彌陀。
期生安養。况今末代。尤宜遵承。遂棲心淨土。主張蓮宗。數十年來。所有積稿。一旦付
之丙丁。不存一矣。於是輟參念佛。純提淨土。而禪者願隨者頗夥。日限尺香。晤客過
此。惟禮拜持念而已。五十七年。遷覺生寺。住持八年。百廢盡舉。於淨業堂外。別立三
堂。曰涅槃。曰安養。曰學士。俾老病者有所依託。初學便於誦習。師於禪淨宗旨。皆深
造其精奧。律已甚嚴。望人甚切。開導說法。如瓶瀉雲興。與衆精修。蓮風大扇。邇遐仰
化。道俗歸心。當時法門。爲第一人。嘉慶五年。退居紅螺山資福寺。以期終歲。衲子依

戀追隨者甚衆。師爲法爲人。心終無厭。遂復留衆。俄成叢席。擔柴運水。泥壁補屋。一飲一殮。與衆共之。師嘗示衆念佛語云。吾人現前一念之心。全眞成妄。全妄卽眞。終日不變。終日隨緣。夫不隨佛界之緣而念佛。便念九界。不念三乘。便念六凡。不念人天。便念三途。不念鬼畜。便念地獄。以凡在有心。不能無念。以無念心體。唯佛獨證。自等覺已歸。皆悉有念。凡起一念。必落十界。更無有念。出十界外。以十法界。更無外故。每起一念。爲一受生之緣。果知此理而不念佛者。未之有也。若此心能與平等大慈。大悲依正功德。以及萬德洪名相應。卽念佛法界也。能與菩提心六度萬行相應。卽念菩薩法界也。以無我心。與十二因緣相應。卽念緣覺法界也。以無我心。觀察四諦。卽念聲聞法界也。或與四禪八定。以及上品十善相應。卽念天法界也。若與五戒相應。卽念人法界也。若修戒善等法。兼懷曠慢勝負之心。卽落修羅法界。若以緩輒心。念下品十惡。卽墜畜生法界。或以緩急相半心。與中品十惡相應。便墮餓鬼法界。若以猛熾心。與上品十惡相應。卽墮地獄法界也。十惡者。卽殺盜淫。妄言。綺語。惡口。兩

舌貪。瞋。邪見。是。反。此。則。爲。十。善。當。密。自。檢。點。日。用。所。起。之。念。與。何。界。相。應。者。多。與。何。界。相。應。者。猛。則。他。日。安。身。立。命。之。處。不。勞。更。問。人。矣。又。曰。眞。爲。生。死。發。菩。提。心。以。深。信。願。持。佛。名。號。十。六。字。爲。念。佛。法。門。一。大。綱。宗。若。眞。爲。生。死。之。心。不。發。一。切。開。示。皆。爲。戲。論。世。間。一。切。重。苦。無。過。生。死。生。死。不。了。生。死。死。生。生。死。死。死。出。一。胞。胎。入。一。胞。胎。捨。一。皮。袋。取。一。皮。袋。若。已。不。堪。况。輪。迴。未。出。難。免。墮。落。豬。胞。胎。狗。胞。胎。何。所。不。鑽。驢。皮。袋。馬。皮。袋。何。所。不。取。此。箇。人。身。最。爲。難。得。最。易。打。失。一。念。之。差。便。入。惡。趣。三。途。易。入。而。難。出。地。獄。時。長。而。苦。重。七。佛。以。來。猶。爲。蟻。子。八。萬。劫。後。未。脫。鷓。身。畜。道。時。長。已。極。鬼。獄。時。長。尤。倍。久。經。長。劫。何。了。何。休。萬。苦。交。煎。無。歸。無。救。每。一。言。之。衣。毛。卓。豎。時。一。念。及。五。內。如。焚。是。故。卽。今。痛。念。生。死。如。喪。考。妣。如。救。頭。然。也。然。我。有。生。死。我。求。出。離。而。一。切。衆。生。皆。在。生。死。皆。應。出。離。彼。等。與。我。本。同。一。體。皆。是。多。生。父。母。未。來。諸。佛。若。不。念。普。度。唯。求。自。利。則。於。理。有。所。虧。心。有。未。安。況。大。心。不。發。則。外。不。能。感。通。諸。佛。內。不。能。契。合。本。性。上。不。能。圓。成。佛。道。下。不。能。廣。利。羣。生。無。始。恩。愛。何。以。解。脫。無。始。

怨愆。何以解釋。積劫罪業。難以懺除。積劫善根。難以成就。隨所修行。多諸障緣。縱有所成。終墮偏小。故須稱性發大菩提心也。然大心既發。應修大行。而於一切行門之中。求其最易下手。最易成就。至極穩當。至極圓頓者。則無如以深信願。持佛名號矣。所謂深信者。釋迦如來。梵音聲相。決無誑語。彌陀世尊。大慈悲心。決無虛願。且以念佛求生之固。必感見佛往生之果。如種瓜得瓜。種豆得豆。響必應聲。影必隨形。因不虛棄。果無浪得。此可不待問佛而能自信者也。况吾人現在一念心性。全真成妄。全妄卽真。終日隨緣。終日不變。橫徧豎窮。當體無外。彌陀淨土。總在其中。以我具佛之心。念我心具之佛。豈我心具之佛。而不應我具佛之心耶。往生傳載。臨終瑞相。班班列列。豈欺我哉。如此信已。願樂自切。以彼土之樂。回觀娑婆之苦。厭離自深。如離廁坑。如出牢獄。以娑婆之苦。遙觀彼土之樂。欣樂自切。如歸故鄉。如奔寶所。總之如渴思飲。如饑如食。如病苦之思良藥。如嬰兒之思慈母。如避怨家之持刀相迫。如墮水火而急求救援。果能如此懇切。一切境緣。莫能引轉矣。然後以此信願之心。執持名

號持一聲是一九蓮種子。念一句是一往生正因。直須心心相續。念念無差。唯專唯勤。無雜無間。愈久愈堅。轉持轉切。久之久之。自成片段。入一心不亂矣。誠然如此。若不往生者。釋迦如來。便爲誑語。彌陀世尊。便爲虛願。有是理乎哉。又曰。吾人生死關頭。唯二種力。一者心緒多端。重處偏墜。此心力也。二者如人負債。强者先牽。此業力也。業力最大。心力尤大。以業無自性。全依於心。心能造業。心能轉業。故心力唯重。業力唯強。乃能牽生。若以重心而修淨業。淨業則強。心重業強。唯西方是趣。則他日報終命盡。定往西方。不生餘處矣。如大樹大牆。尋常向西而歪。他日若倒。決不向餘處也。何謂重心。我輩修習淨業。信貴於深。願貴於切。以信深願切故。一切邪說莫能搖惑。一切境緣莫能引轉。若正修淨業時。倘達摩大師忽現在前。乃曰。吾有直指人心見性成佛之禪。汝但捨置念佛。吾卽以此禪授汝。但當向祖師作禮。謂我先已受釋迦如來念佛法門。發願受持。終身不易。祖師雖有深妙禪道。吾則不敢自違本誓也。縱或釋迦如來忽爾現身。謂曰。吾先說念佛法門。特一時方便耳。今更有殊勝法門。

超於彼者。汝當且置念佛。吾卽爲說勝法。亦祇可向佛稽首陳曰。我先稟受世尊淨業法門。發願一息尙存。決不更張。如來雖有勝法。吾則不敢自違本願也。雖佛祖現身。尙不改其所信。況魔王外道。虛妄邪說。豈足以搖惑之耶。能如是信。其信可謂深矣。若赤熱鐵輪。旋轉頂上。不以此苦。退失往生之願。若輪王勝妙五欲現前。亦不以此樂。退失往生之願。此逆順至極。尙不改所願。況世間小小逆順境界。豈能引轉哉。能如是願。其願可謂切矣。信深願切。是謂重心。而修淨業。淨業必強。心重故則易純。業強故則易熟。極樂淨業若熟。娑婆染緣便盡。果得染補已盡。則臨終時。雖欲輪迴境界。再現在前。亦不可得。果得淨業已熟。則臨終時。雖欲彌陀淨土。不現在前。亦不可得。然此信願。要在操之有素。臨時自不入於岐路。如古德臨欲命終。六欲天童。次第接引。皆不去。唯專心待佛。後佛現。乃曰佛來也。遂合掌而逝。夫臨欲命終。四大分張。此何時也。六欲天童。次第接引。此何境也。苟素常信願不到十分堅固。當此時。對此境。而能強作主宰乎。如古德真可謂千古修淨業者之標榜矣。問。諸方皆有淨土。

何專讚西方。求願往生耶。答。此非人師意也。乃金口誠言。分明指示故。大乘顯密諸經。同指歸故。令初心人專注一境。三昧易成故。四十八願爲緣。緣強故。十念爲因。因勝故。佛與衆生偏有緣故。此土衆生無論僧俗男女。老幼善惡之人。當其處極順逆苦樂境緣之時。多必由中而發。衝口而出。念佛一聲。然不念佛則已。凡念佛必念阿彌陀佛。此誰使之然。蓋衆生久蒙佛化。久受佛恩。與佛緣深故也。且此彌陀一經。羅什最初譯成。東林遠祖。卽與一百二十三人。結社念佛。其一百二十三人。以次漸化。臨終皆留瑞應。雖鸚鵡八哥念佛。化時皆有瑞相。此非衆生與佛緣深。謂之何哉。又無量壽經云。當來經道滅盡。我以願力。特留此經。更住百年。廣度含識。夫不留他經。而獨留此經者。豈非以此法門。下手易而攝機普。入道穩而獲益速耶。以是而知。其時愈後。此法愈常機矣。一句佛號。不雜異緣。十念功成。頓超多劫。於此不信。真同木石。捨此別修。非狂卽癡。復何言哉。又曰。知小而不知大。見近而不見遠者。此衆生之常分也。如阿彌陀佛。於諸衆生。有大恩德。衆生不知也。佛於無量劫前。對世自在王。

佛。普爲惡世界苦衆生。發四十八種大願。依願久經長劫。修菩薩行。捨金輪王位。國城妻子。頭目腦髓。不知其幾千萬億。此但萬行中內外財布施一行也。如是忍人所不能忍。行人所不能行。圓修萬行。力極功純。嚴成淨土。自致成佛。分身無量。接引衆生。方便攝化。令生彼國。然則如爲一人。衆多亦然。如爲衆多。一人亦然。若以衆多視之。佛則普爲一切衆生也。若以一人視之。佛則專爲我一人也。稱性大願。爲我發也。長劫大行。爲我修也。四土爲我嚴淨也。三身爲我圓滿也。以至頭頭現身接引。處處顯示瑞應。總皆爲我也。我造業時。佛則警覺我。我受苦時。佛則拔濟我。我皈命時。佛則攝受我。我修行時。佛則加被我。佛之所以種種爲我者。不過欲我念佛也。欲我往生也。欲我永脫衆苦。廣受法樂也。欲我展轉化度一切衆生。直至一生補佛而後已也。噫。佛之深恩重德。非父母所可比。雖天地不足喻其高厚矣。非聞開示。安知此意。不讀佛經。安曉此理。今而後已知之矣。雖有竭力精修。盡報皈誠。拚命念佛而已。復何言哉。師居紅螺十年。至嘉慶十五年。二月詣萬壽寺。埽粹祖塔。辭諸山外護。囑曰。

幻緣不久。人世非常。虛生可惜。各宜努力念佛。他年淨土好相見也。三月還山。命預辦茶毘事物。十月十七日。集衆付院務。命弟子松泉。領衆住持。誡曰。念佛法門。三根普被。無機不收。吾數年來。與衆苦心建此道場。本爲接待方來。同修淨業。凡吾所立規模。永宜遵守。不得改弦易轍。庶不負老僧與衆一片苦心也。臨示寂半月前。覺身微疾。命大衆助稱佛號。見虛空中幢幡無數。自西而來。乃告衆曰。淨土相現。吾將西歸矣。衆以住世相勸。師曰。百年如寄。終有所歸。吾得臻聖境。汝等當爲師幸。何苦留耶。十二月十六日。命監院師貫一。設涅槃齋。十七日申刻。告衆曰。吾昨已見文殊觀音。勢至三大士。今復蒙佛親垂接引。吾今去矣。衆稱佛衆愈厲。師面西端坐。合掌曰。稱一聲洪名。見一分相好。遂手結彌陀印。安詳而逝。衆聞異香浮空。供奉七日。面貌如生。慈和豐滿。髮白變黑。光潤異常。二七入龕。三七茶毘。獲舍利百餘粒。門弟子遵遺命。請靈骨葬於普同塔內。師生於乾隆六年十月十四日未時。示寂於嘉慶十五年十二月十七日申時。世壽七十。僧臘四十九。法臘四十有三。有徹悟禪師語錄一

冊。示禪教律念佛伽陀。行於世。嘉慶十七年。壬申九月既望。有師之弟子惺聰者。持師行實。請述於余。余與師相契有年。素蒙開誨。啓迪良多。師真過量人也。六根通利。解悟超常。既具辯才。兼持苦行。終始如一。余所目覩。故此述不容一字假飾。愧余不文。特質言之。以爲傳信云爾。拈花寺。慕蓮杜多體寬通申敬述。

附放生文 蓋聞世間至重者生命。天下最慘者殺傷。是故逢擒則奔。蟻蟲猶知避死。將雨而徙。螻蟻尙且貪生。何乃網於山。罟於淵。多方掩取。曲而鉤。直而矢。百計搜羅。使其膽落魂飛。母離子散。或囚籠檻。則如處囹圄。或被刀砧。則若臨劓戮。憐兒之鹿。舐瘡痕而寸斷腸。畏死之猿。望弓影而雙垂悲淚。恃我強而陵彼弱。理恐非宜。食他肉而補己身。心將安忍。由是昊天垂憫。古聖行仁。解網著於成湯。畜魚於子產。聖哉流水。潤枯槁以囊泉。悲矣釋迦。代危亡而割肉。天台智者。鑿放生之池。大樹仙人。護棲身之鳥。贖鱗蟲而得度。壽禪師之遺愛猶存。救龍子而傳方。孫真人之慈風未泯。一活蟻也。沙彌易短命爲長年。書生易卑名

爲上第一放龜也。毛寶以臨危而脫難。孔愉以微職而封侯。屈師縱鯉於元村。壽增一紀。隨侯濟蛇於齊野。珠報千金。拯已溺之蠅。酒匠之死刑免矣。捨將烹之鼈。廚婢之篤疾瘳焉。買死命於屠家。張提刑魂超天界。易餘生於釣艇。李景文毒解丹砂。孫良嗣解繪繳之危。卜葬而羽蟲交助。潘縣令設江湖之禁。去任而水族悲號。信老免愚民之牲。祥符甘雨。曹溪守獵人之網。道播神州。雀解銜環報恩。狐能臨井授術。乃至殘軀得命。垂白壁以聞經。難地求生。現黃衣而入夢。施皆有報。事匪無徵。載在簡編。昭乎耳目。普願隨所見物。發慈悲心。捐不堅財。行方便事。或恩周多命。則大積陰功。若惠及一蟲。亦何非善事。苟日增而月累。自行廣而福崇。慈滿人寰。名通天府。蕩空怨障。多祉萃於今生。培漬善根。餘慶及於他世。儻更助稱佛號。加諷經文。爲其回向西方。令彼永離惡道。則存心愈大。植德彌深。道業資之速成。蓮臺生其勝品矣。

徹悟禪師語錄

(訥堂老人原序)

余自乾隆癸巳住持京都廣通寺。領衆參禪。間有東語西話。筆以記之。至丁卯歲。以宿業深重。多諸病緣。因思教乘五停心觀。多障有情。以念佛治。且此一門。文殊普賢等諸大菩薩。馬鳴龍樹等諸大祖師。智者永明。楚石蓮池等諸大善知識。皆悉歸心。我何人斯。敢不歸命。於是朝暮課佛。而禪者願隨者。頗夥。因順時機。且便自行。遂輟參念佛。時門牆見重者。謗讟四起。余以深信佛言。不顧也。十餘年來。所有積稿。一旦付之丙丁。不意爲多事禪者。於灰燼中撥出若干則。然百不存一矣。嗣後爲業風所吹。歷主覺生資福兩刹。爲虛名所誤。往往有請開示索題跋者。迫不得已而應之。日久歲深。復積成卷。戊辰夏。李居士逢春。在山聽講。聞法有悟。遂欲付之剞劂。余曰。不可。身旣隱矣。焉用文爲。此世間隱者之言尙然。余已栖心淨土。復何文字可留。居士堅請不已。爰弁數語。用示皆不得已之言也。嘉慶歲次庚午重陽後三日。訥堂道人。

書於資福二有丈室。

一信生必有死。普大之下。從古至今。曾無一人逃得。

二信人命無常。出息雖存。入息難保。一息不來。卽爲後世。

三信輪回路險。一念之差。便墮惡趣。得人身。如爪上土。失人身者。如大地土。

四信苦趣時長。三途一報。五千劫。再出頭來。是幾時。

五信佛語不虛。此日月輪。可令墮落。妙高山王。可使傾動。諸佛所言。無有異也。

六信實有淨土。如今娑婆無異的的現有。

七信願生卽生。已今當願。已今當生。經有明文。豈欺我哉。

八信生卽不返。境勝緣強。退心不起。

九信一生成佛。壽命無量。何事不辦。

十信法本唯心。唯心有具。造二義。如上諸法。皆我心具。皆我心造。

信佛語故。則造後四。不信佛語。但造前四。故深信佛言。卽深信自心也。修淨業者。

能具此十種信心。其樂土之生。如操左券而取故物。夫何難之有。甲子七月訥堂道人書。

普說

一切法門。以明心爲要。一切行門。以淨心爲要。然則明心之要。無如念佛。憶佛念佛。現前當來。必定見佛。不假方便。自得心開。如此念佛。非明心之要乎。復次淨心之要。亦無如念佛。一念相應。一念佛。念念相應。念念佛。清珠下於濁水。濁水不得不清。佛號投於亂心。亂心不得不佛。如此念佛。非淨心之要乎。一句佛號。俱攝悟修。兩門之要。舉悟則信。在其中。舉修則證。在其中。信解修證。俱攝大小諸乘。一切諸經之要。罄無不盡。然則一句彌陀。非至要之道乎。

吾人現前一念之心。全真成妄。全妄卽真。終日不變。終日隨緣。夫不隨佛界之緣。而念佛界。便念九界。不念三乘。便念六凡。不念人天。便念三途。不念鬼畜。便念地獄。以凡在有。心不能無念。以無念心體。唯佛獨證。自等覺已還。皆悉有念。凡起一念。必落。

十界更無有念出十界外。以十法界更無外故。每起一念。爲一受生之緣。果知此理。而不念佛者。未之有也。若此心能與平等大慈大悲。依正功德。以及萬德洪名相應。卽念佛法界也。能與菩提心六度萬行相應。卽念菩薩法界也。以無我心與十二因緣相應。卽念緣覺法界也。以無我心觀察四諦。卽念聲聞法界也。或與四禪八定。以及上品十善相應。卽念天法界也。若與五戒相應。卽念人法界也。若修戒善等法。兼懷瞋慢勝負之心。卽落修羅法界。若以緩輒心。念下品十惡。卽墮畜生法界。或於緩急相半心。與中品十惡相應。便墮餓鬼法界。若以猛熾心。與上品十惡相應。卽墮地獄法界也。十惡者。卽殺盜淫妄言綺語惡口兩舌貪瞋邪見是。反此則爲十善。當密自檢點。日用所起之念。與何界相應者多。與何界相應者猛。則他日安身立命之處。不勞更問人矣。』一切境界。唯業所感。唯心所現。卽其現處。當體卽心。凡在有心。不能無境。不現佛境。便現九界之境。不現三乘之境。便現六凡之境。不現天人鬼畜之境。便現地獄境界。佛及三乘所現境界。雖有優降不同。要皆受享法樂而已。三界諸

天所現之境。但唯受用禪定五欲之樂。人道之境。苦樂相間。各隨其業。多少不同。鬼畜之境。苦多樂少。至於地獄。則純一極苦。如人夢中所見山川人物。皆依夢中所現。若無夢心。必無夢境。設無夢境。亦無夢心。故知心外無境。境外無念。全境卽心。全心卽境。若於因中察果。當須觀心。設於果處驗因。當須觀境。故曰。未有無心境。曾無無境心。果必從因。因必克果。苟真知此心境因果。一如不二之理。而猶不念佛。求生淨土者。吾不信也。

『眞爲生死。發菩提心。以深信願。持佛名號。』十六字爲念佛法門。一太綱宗。若眞爲生死之心不發。一切開示。皆爲戲論。世間一切重苦。無過生死。生死不了。死死生生。生死死。出一胞胎。入一胞胎。捨一皮袋。取一皮袋。苦已不堪。況輪回未出。難免墮落。豬胞胎。狗胞胎。何所不鑽。驢皮袋。馬皮袋。何所不取。此箇人身。最爲難得。最易打失。一念之差。便入惡趣。三途易入。而難出。地獄時長。而苦重。七佛以來。猶爲蟻子。八萬劫後。未脫鷓身。畜道時長已極。鬼獄時長尤倍。久經長劫。何了何休。萬苦交煎。

無歸無救。每一言之。衣毛卓豎。時一念及。五內如焚。是故卽今痛念生死。如喪考妣。如救頭然也。然我有生死。我求出離。而一切衆生皆在生死。皆應出離。彼等與我本同一體。皆是多生父母。未來諸佛。若不念普度。唯求自利。則於理有所虧。心有未安。況大心不發。則外不能感通諸佛。內不能契合本性。上不能圓成佛道。下不能廣利羣生。無始恩愛。何以解脫。無始怨愆。何以解釋。積劫罪業。難以懺除。積劫善根。難以成熟。隨所修行。多諸障緣。縱有所成。終墮偏小。故須稱性發大菩提心也。然大心旣發。應修大行。而於一切行門之中。求其最易下手。最易成就。至極穩當。至極圓頓者。則無如以深信願。持佛名號矣。所謂深信者。釋迦如來梵音聲相。決無誑語。彌陀世尊大慈悲心。決無虛願。且以念佛求生之因。必感見佛往生之果。如種瓜得瓜。種豆得豆。響必應聲。影必隨形。因不虛棄。果無浪得。此可不待問佛而能自信者也。況吾人現前一念心性。全真成妄。全妄卽真。終日隨緣。終日不變。橫徧豎窮。當體無外。彌陀淨土。總在其中。以我具佛之心。念我心具之佛。豈我心具之佛。而不應我具佛之

心耶。往生傳載終瑞相。班班列列。豈欺我哉。如此信已。願樂自切。以彼土之樂。回觀娑婆之苦。厭離自深。如離廁坑。如出牢獄。以娑婆之苦。遙觀彼土之樂。欣樂自切。如歸故鄉。如奔寶所。總之如渴思飲。如饑思食。如病苦之想良藥。如嬰女之思慈母。如避怨家之持刀相迫。如墮水火而急求救援。果能如此懇切。一切境緣。莫能引轉矣。然後以此信願之心。執持名號。持一聲是一九蓮種子。念一句是一往生正因。直須心心相續。念念無差。唯專唯勤。無雜無間。愈久愈堅。轉持轉切。久之久之。自成片斷。入一心不亂矣。誠然如此。若不往生者。釋迦如來便爲誑語。彌陀世尊便爲虛願。有是理乎哉。

觀經是心作佛。是心是佛。二語較之禪宗直指人心。見性成佛。尤爲直截痛快。何也。以見性難。而作佛易故。何爲見性。離心意識。靈光迸露。始爲見性。故難。何爲作佛。持佛名號。觀佛依正。卽爲作佛。故易。經云。汝等心想佛時。是心卽是三十二相。八十種好。豈非以想念於佛。卽爲作佛耶。夫成佛是佛。理無二致。而見性作佛。難易相懸。若

是。豈非念佛較之參禪。尤爲直截痛快也哉。一是祖語。一是佛言。何重何輕。何取何捨。學者但當盡捨舊習。虛其心。平其氣。試一玩味而刻點之。當必首肯是說爲不謬矣。

淨土門中。以願爲最。凡有願者。終必能滿。如鬱頭藍弗。習非非。想定於水邊林下。每定將成。多爲魚鳥所驚。因發惡願曰。吾他日後當作飛狸。入林食鳥。入水食魚。後非想定成。遂生天上。壽八萬大劫。天報既終。遂墮爲飛狸。入林水以食魚鳥。此惡願也。與性相違。尙有大力用。八萬劫後能滿。況稱性之善願乎。神僧傳載一僧於石佛前。戲發願曰。如今生生死不了。願來生作威武大臣。後果作大將軍。此戲發之願也。尙終得遂。況至誠所發之願乎。復載一僧博通經論。所至無所遇。乃咨嗟歎息。傍一僧曰。汝學佛法。獨不聞未成佛果。先結人緣。汝雖明佛法。其如無緣何。其僧曰。我卽終於此乎。傍僧曰。吾代汝爲之。問其僧有何所畜。曰。無他。僅餘一衣料耳。曰。此亦足矣。遂變價置買食物。引其僧至一深林。禽鳥昆蟲甚多之處。置食於地。復教以發願。乃

屬曰。汝二十年後。方可開法。其僧如所屬。至二十年後。始開法。受化者多少。年蓋皆受食之禽鳥昆蟲也。此願力之不可思議也。尙能以他人之願。攝彼蟲鳥。脫異類而入人道。豈自願不能自度耶。佛以四十八願。自致成佛。而我所發之願。正合佛攝生之願。此則直以發願。便可往生。而況佛有不思議大慈大悲。如瑩珂。酒肉無擇之人。後閱往生傳。每讀一傳。爲一首肯。遂斷食念佛。至七日。感佛現身慰之曰。汝陽壽尙有十年。當好念佛。吾十年後來接汝。珂曰。娑婆濁惡。易失正念。願早生淨土。承事諸聖。佛曰。汝志如此。我三日後來接汝。三日後。果得往生。又懷玉禪師。精修淨業。一日見佛菩薩滿虛空中。一人執銀臺而入。玉念曰。吾一生精進。志在金臺。今胡不然。銀臺遂隱。玉彌加精進。二十一日後。復見佛菩薩徧滿虛空。前持銀臺者。易金臺而至。玉遂泊然而逝。劉遺民依叢林。結社念佛。一日想念佛次。見佛現身。劉念曰。安得如來手摩我頭乎。佛卽手摩其頭。復念曰。安得如來衣覆我體乎。佛卽以衣覆其體。於戲。佛之於衆生。無所不至。眞可謂大慈悲父母矣。欲速生。卽令速生。欲金臺。卽易金

臺欲手摩頭卽摩頭。欲衣覆體卽覆體。佛旣慈悲一切衆生。豈獨不慈悲我乎。佛旣滿一切衆生之願。豈獨不滿我之願乎。大慈悲心。無有揀擇。安有此理。是以眞能發願。則信在其中。信願旣眞。行不期起而自起。是故信願行三種資糧。唯一願字盡之矣。

世之最可珍重者。莫過精神。世之最可愛惜者。莫過光陰。一念淨卽佛界緣起。一念染卽九界生因。凡動一念卽十界種子。可不珍重乎。是日已過。命亦隨滅。一寸時光卽一寸命光。可不愛惜乎。苟知精神之可珍重。則不浪用。則念念執持佛名。光陰不虛度。則刻刻熏修淨業。倘置佛名而別修三乘聖行。亦是浪用精神。亦是千鈞之弩。爲鼠鼯而發機。況造六凡生死之業乎。倘置淨業而別取權乘小果。亦是虛度光陰。亦是以如意寶珠而買一衣一食。況取人天有漏之果乎。如是珍重。如是愛惜。則心專而佛易感。行勤而業易精。果得眞生淨土。親見彌陀。時承開示。面奉慈音。妙悟自心。深證法界。延一念爲長劫。促長劫爲一念。念劫圓融。得大自在。得非自食其珍重。

愛惜之報乎。

夫見道而後修道。修道而後證道。此千聖同途。千古不易之定論也。然見道豈易言哉。若依教乘。必大開圓解。若依宗門。必直透重關。然後得論修道。否則便爲盲修瞎鍊。不免撞牆磕壁。墮陀落塹矣。唯淨土一門。則不然。從是西方。過十萬億佛土。有世界名曰極樂。其土有佛。號阿彌陀。今現在說法。但發願持名。卽得往生。此乃佛心佛眼。親知親見之境界。非彼三乘賢聖所能知見也。但當深信佛言。依此而發願持名。卽是以佛知見爲知見。不必求別悟門也。餘門修道。必悟後依法修習。攝心成定。因定發慧。因慧斷惑。所發之慧。有勝劣。所斷之惑。有淺深。然後方可論其退與不退。唯此淨土門中。門以信願之心。專持名號。持至一心不亂。淨業卽爲大成。身後決定往生。一得往生。便永不退轉。又餘門修道。先須懺其現業。若現業不懺。卽能障道。則進修無路矣。修淨業者。乃帶業往生。不須懺業。以至心念佛一聲。能滅八十億劫生死重罪故。又餘門修道。須斷煩惱。若見思煩惱分毫未盡。則分段生死不盡。不能出離。

同居國土。唯修淨業。乃橫出三界。不斷煩惱。從此同居。生彼同居。一生彼土。則生死根株便永斷矣。既生彼土。則常見佛。時聞法。衣食居處。出於自然。水鳥樹林。皆悉說法。同居土中。橫見上三淨土。諸上善人。俱會一處。圓證三種不退。一生便補佛位。然則淨土一門。最初省求悟門。末後不待發慧。不須懺業。不斷煩惱。至極省要。至極徑捷。及其證入。至極廣大。至極究竟。學者當細心玩味而詳擇之。毋以一時貢高。失此殊勝最大利益也。

一窮人遙望。見錢一串。就而取之。乃蛇也。遂瞠立於其傍。復一人至。得錢一串。攜去。夫錢非蛇也。而蛇現者。唯業所感。唯心所現也。錢上之蛇。固是業感心現。而蛇上之錢。獨非業感心現乎。錢上之蛇。一人之別業妄見也。蛇上之錢。多人之同分妄見也。一人之妄見。其妄易知。多人之妄見。其妄難知。以易知例難知。難知亦易知矣。然則蛇固蛇也。錢亦蛇也。推此而往。內而根身。外而境界。由一方而至十方。以及四大部洲。三千大千世界。皆此錢上之蛇也。但唯心之蛇。既現。便能螫人。唯心之錢。既現。便

得享用。非謂唯心。便無外境。且娑婆之穢苦。安養之淨樂。皆唯心現。唯心之穢苦。既現。則遭大逼迫。唯心之淨樂。既現。則得大受用。既穢苦淨樂。皆唯心現。何不捨唯心之穢苦。以取唯心之淨樂。而乃久經長劫。甘爲八苦之所交煎也哉。

吾人生死關頭。唯二種力。一者心緒多端。重處偏墜。此心力也。二者如人負債。強者先牽。此業力也。業力最大。心力尤大。以業無自性。全依於心。心能造業。心能轉業。故心力唯重。業力唯強。乃能牽生。若以重心。而修淨業。淨業則強。心重業強。唯西方是趨。則他日報終。命盡。定往西方。不生餘處矣。如天樹大牆。尋常向西而歪。他日若倒。決不向餘處也。何爲重心。我輩修習淨業。信貴於深。願貴於切。以信願深切。一切邪說。莫能搖惑。一切境緣。莫能引轉。若正修淨業時。倘達摩大師。忽現在前。乃曰。吾有直指人心。見性成佛之禪。汝但捨置念佛。吾卽以此禪授汝。但當向祖師作禮。謂我先已受釋迦如來念佛法門。發願受持終身。不易。祖師雖有深妙禪道。吾則不敢自違本誓也。縱或釋迦如來。忽爾現身。謂曰。吾先說念佛法門時。一時方便耳。今更

有殊勝法門。超於彼者。汝當且置念佛。吾卽爲說勝法。亦祇可向佛稽首陳白。我先稟受世尊淨業法門。發願一息尙存。決不更張。如來雖有勝法。吾則不敢自違本願也。雖佛祖現身。尙不改其所信。況魔王外道。虛妄邪說。豈足以搖惑之耶。能如是信。其信可謂深矣。若赤熱鐵輪旋轉頂上。不以此苦退失往生之願。若輪王勝妙五欲現前。亦不以此樂退失往生之願。此逆順至極。尙不改所願。況世間小小逆順境界。豈能引轉哉。能如是願。其願可謂切矣。信深願切。是謂重心。而修淨業。淨業必強。心重。故則易純。業強。故則易熟。極樂淨業若熟。娑婆染緣便盡。果得染緣已盡。則臨終時。雖欲輪回境界。再現在前。亦不可得。果得淨業已熟。則臨終時。雖欲彌陀淨土。不現在前。亦不可得。然此信願要在操之有素。臨時自不入於歧路。如古德臨欲命終。六欲天童次第接引。皆不去。唯專心待佛。後佛現。乃曰佛來也。遂合掌而逝。夫臨欲命終。四大分張。此何時也。六欲天童次第接引。此何境也。苟素常信願。不到十分堅固。當此時。對此境。而能強作主宰乎。如古德真可謂千古修淨業者之標榜矣。

有禪者問曰。一切諸法。悉皆如夢。娑婆固夢也。極樂亦夢也。既同是一夢。修之何益。余曰。不然。七地以前。夢中修道。無明大夢。雖等覺猶眠。唯佛一人。始稱大覺。當夢眼未開之時。苦樂宛然。與其夢受娑婆之極苦。何若夢受極樂之妙樂。況娑婆之夢。從夢入夢。夢之又夢。展轉沈迷者也。極樂之夢。從夢入覺。覺之又覺。漸至於大覺者也。可概論乎。

佛法大海。信爲能入。淨土一門。信尤爲要。以持名念佛。乃諸佛甚深行處。唯除一生所繫菩薩。可知少分。自餘一切賢聖。但當遵信而已。非其智分之所能知。況下劣凡夫乎。然十一善法。以信居初。信心之前。更無善法。五十五位。以信爲始。信位之前。別無聖位。故菩薩造起信論。祖師作信心銘。以信心一法。爲入道要門也。昔王仲回問於楊無爲曰。念佛如何得不間斷。去。楊曰。一信之後。更不再疑。王欣然而去。未久。楊夢仲回致謝。謂因蒙指示。得大利益。今已生淨土矣。楊後見仲回之子。問及仲回去時光景。及去之時節。正楊得夢之日。噫。信之時義大矣哉。

法藏比丘對世自在王佛發稱性四十八種大願。依願久經無量長劫。修習大行。至於因圓果滿。自致成佛。法藏轉名彌陀。世界轉名極樂。彌陀之所以爲彌陀者。深證其唯心自性也。然此彌陀極樂。非自性彌陀。唯心極樂乎。但此心性。乃生佛平等共有。不偏屬佛。亦不偏屬衆生。若以心屬彌陀。則衆生乃彌陀心中之衆生。若以心屬衆生。則彌陀乃衆生心中之彌陀。以彌陀心中之衆生。念衆生心中之彌陀。豈衆生心中之彌陀。不應彌陀心中之衆生耶。但佛悟此心。如醒時人。衆生迷此心。如夢中人。離醒時人。無別夢中之人。豈離夢中之人。別有醒時之人耶。但夢中之人。當不自認爲真。亦不離夢中之人。別求醒時之人。唯應常憶醒時之人。憶之又憶。則將見大夢漸醒。而夢眼大開。卽夢中能憶之人。便是所憶醒時之人。而醒時之人。非夢中人也。夢中人衆多。醒時人唯一。十方諸如來。同共一法身。一心一智慧。力無畏亦然。此乃卽一卽多。常同常別。法爾自妙之法也。念佛之意。大略如此。

生則決定生。去則實不去。二語。上句說事。下句說理。事是卽理之事。謂生卽不生。非

直以生爲生也。理是卽事之理。謂不去而去。非直以不去爲不去也。兩句作一句看。則事理圓融。所謂合之則雙美也。若兩句作兩句看。則事理分張。所謂離之則兩傷也。若不合此兩句作一句。便當演此兩句作四句。謂生則決定生。生而無生。去則實不去。不去而去。雖爲四句。義亦無增。合爲一句。義亦無減。總一事理圓融耳。與其執去則實不去之理。不如執生則決定生之事爲得。何也。以執事味理。猶不虛入品之功。若執理廢事。便不免落空之誚。以事有偕理之功。理無獨立之能故也。以有生爲生。則墮常見。以不去爲不去。則墮斷見。斷常雖同一邪見。而斷見之過患深重。故不若執事之爲得。然總不如圓會二句爲佳。

吾人現前一念。緣生無性。無性緣生。不生佛界。便生九界。若約緣生無性。則生佛平等一空。若約無性緣生。則十界勝劣懸殊。阿祈達王臨終。爲驅蠅人以拂拂面。一念瞋心。遂墮爲毒蛇。一婦人渡河失手。其子墮水。因撈子故。與之俱沒。以慈心故。得生天上。夫一念慈瞋。天畜遂分。則此臨終之緣生一念。可不慎乎。苟以此心緣念彌陀。

求生淨土。得不見佛往生乎。但此一念。不可僥倖而致。必須存之以誠。操之有素。是故吾輩於此一句彌陀。千念萬念。以至終日終年念者。無非爲熟此一念而已。果得一念純熟。則臨命終時。唯此一念。更無異念。智者大師云。臨終在定之心。卽淨土受生之心。然唯此一念。更無異念。非在定之心乎。念果如是不見彌陀。更見何人。不生淨土。更生何處。只恐吾人自信不及耳。

『觀經是心作佛。是心是佛。二語既舉。則言外之心不作佛。心不是佛。心作九界。心是九界。心不作九界。心不是九界。等義俱彰矣。噫。果明此理。而猶不念佛者。則吾未如之何也已矣。』

『觀經是心作佛。是心是佛。二語。不唯是觀經一經綱宗法要。實是釋迦如來一代時教大法綱宗。不唯釋迦一佛法藏綱宗。實是十方三世一切諸佛法藏綱宗。此宗既透。何宗不透。此法既明。何法不明。所謂學雖不多。可齊上賢也。眞法無性。染淨從緣。一眞既舉。體成十界。則十界全體卽一眞。是故善談心性者。必不棄離於因果。而

深信因果者終必大明乎心性。此理勢所必然也。

吾人現前一念能念之心。全真成妄。全妄卽真。終日隨緣。終日不變。一句所念之佛。全德立名。德外無名。以名召德。名外無德。能念心外。無別所念之佛。所念佛外。無別能念之心。能所不二。生佛宛然。本離四句。本絕百非。本徧一切。本含一切。絕待圓融。不可思議。蓮宗行者當從者裏信人。」

殺生一事。過患至爲深重。一切衆生。皆有佛性。生可殺乎。造重業。縱殺心。結深怨。感苦果。皆由一殺所致。是以殺心漸猛。殺業漸深。漸以殺人。以及殺其六親。甚而積爲刀兵大劫。可悲也矣。蓋皆由不知戒殺之所致。苟知戒殺。性且不忍殺。況殺人乎。況殺六親乎。性不忍殺。刀兵大劫。何所從來。殺人之父者。人亦殺其父。殺人之兄者。人亦殺其兄。知人之父兄不可殺。亦戒殺之漸。但不知殺父兄者。由於不戒殺始也。人之所以不戒殺者。由於不達因果之理。因果者。感應也。我以惡心感之。人亦以惡心應。我以善心感之。人亦以善心應。人但知感應見於現生。而不知感應通於三世。

也。人但知感應見於人道。而不知感應通於六道也。果知感應通於三世六道。六道中皆多生之父兄。殺可不戒乎。縱知感應通於六道。亦不知感應通於世出世間也。以無我心感。則聲聞緣覺之果應之。以菩提心六度萬行感。則菩薩法界果應之。以平等大慈同體大悲感。則佛法界果應之。噫。感應之道。可盡言哉。

須知一句阿彌陀佛。以唯心爲宗。此唯心之義。須以三量楷定。三量者。現量。比量。聖言量也。現量者。謂親證其理也。如羅什大師。七歲隨母入佛寺。見佛鉢。喜而頂戴之。俄而念曰。我年甚幼。佛鉢甚重。何能頂戴。是念纔動。忽失聲置鉢。遂悟萬法唯心。高麗惟曉法師。來此土參學。夜宿塚間。渴甚。明月之下。見清水一汪。以手掬而飲之。殊覺香美。至次日清晨。乃見其水爲墓中控出。遂惡心大吐。乃悟萬法唯心。便回本國著述。此皆現量親證也。比量者。借衆相而觀於義。比喻而知也。諸喻之中。夢喻最切。如夢中所見山川人物。萬別千差。皆不離我能夢之心。離夢心外。別無一法可得。卽此可以比喻。而知現前一切萬法。但唯心現也。聖言量者。三界唯心。萬法唯識。千經

萬論皆如是說。已約現等三量。楷定唯心。更約事理二門。辨明具造。謂由有理具。方有事造。理若不具。事何所造。所以理具。但具事造。離事造外。無別所具。由有事造。方顯理具。事若不造。爭知理具。所以事造。祇造理具。離理具外。別無所造。祇此一念心中。本具十界萬法。卽此一念隨緣。能造十界萬法。理具如金。中本具可成餅盤釵釧之理。事造如隨工匠鑪錘之緣。造成餅盤釵釧之器。又理具如麵。中本具可成種種食物之理。事造如水火人工之緣。造成種種食品也。已辨事理。復約名體同異。揀定眞妄。佛法中有名同而體異者。有名異而體同者。名同體異。如心之一名。有肉團心。有緣慮心。有集起心。有堅實心。肉團心同外四大。無所知識。緣慮心通於八識。以八種識皆能緣慮自分境故。此則是妄。集起心唯約第八。以能集諸法種子。能起諸法現行故。此則眞妄和合。堅實心者。卽堅固眞實之性。乃離念靈知。純真心體也。今言唯心者。乃堅實純眞之心也。名異體同者。如諸經中所說。眞如佛性。實相法界等。種種極則之名。皆此堅實純眞心也。已揀眞妄。還約本有現前。折衷指點。以諸經皆言

無始本有真心。夫既曰本有。卽今豈無。而今現有。卽本有也。若無無始。則無現前。若離現前。豈有無始。是故不必高尊本有。遠推無始。但現前一念。心之自性。卽本有真心也。以現前一念。全眞成妄。全妄卽眞。終日隨緣。終日不變。離此現前一念之外。豈別有真心自性哉。古德云。威音那畔。不離今世門頭。衆生現行無明。卽是諸佛不動智體。其庶幾乎。由上四義。以顯唯心。故一以唯心爲宗也。又一句阿彌陀。以唯佛爲宗。以一切萬法。旣唯心現。全體唯心。心無彼此。心無分際。於此界萬法。若依若正。假名實法。隨拈一法。皆卽心之全體。皆具心之大用。如心橫徧。如心豎窮。以唯心義成。唯色唯聲唯香唯味唯觸唯法。乃至唯微塵。唯芥子。一切唯義俱成。一切唯義俱成。方成眞唯心義。若一切唯義不成。但有唯心之虛名。而無唯心之實義。以一切唯義俱成。故曰法無定相。遇緣卽宗。唯微塵。唯芥子。尙可爲宗。八萬相好莊嚴之果地彌陀。反不可以爲宗耶。故以唯佛爲宗。又以絕待圓融爲宗。於十界萬法。隨拈一法。無非卽心全體。具心大用。橫徧十方。豎窮三際。離於四句。絕於百非。獨體全眞。更無有

外。彌滿清淨。中不容他。一法既爾。萬法皆然。各約諸法當體。絕待無外。是爲絕待。又以十界萬法。各各互徧。各各互含。一一交羅。一一該徹。彼彼無障無礙。各各無壞無雜。如當臺古鏡。影現重重。如帝網千珠。回環交攝。此約諸法迭互相望。是爲圓融。今合絕待圓融爲一宗。正絕待時卽圓融。正圓融時便絕待。非離絕待別有圓融。絕待絕待其圓融。非離圓融別有絕待。圓融圓融其絕待。絕待圓融。各皆不可思議。今共合爲一宗。則不思議中不思議也。又超情離見爲宗。以但約諸法絕待。離過絕非。已超一切衆生情妄執著。三乘賢聖所見差別。若約諸法圓融。圓該四句。融會百非。尤非凡情聖見之所能及。故總立超情離見爲宗。初以唯心爲宗。次以唯佛爲宗。三以絕待圓融爲宗。末以超情離見爲宗。總此四重宗旨。方是一句彌陀正宗。宗旨豈易言哉。

此一念佛法門。如天普蓋。似地普擎。無有一人一法。能出其外不在其中者。如華嚴全經。雖有五周四分之殊。以因果二字。該盡無餘。四十一位因心。無一心而不趨向。

果覺四十一位所修種種法行。豈非皆念佛法行也。而末後普賢以十大願王。導歸極樂。爲全經一大結穴。不其然乎。又華嚴者。以萬行因華。莊嚴一乘佛果。此萬行非念佛法耶。華嚴具婆須蜜女。無厭足王。勝熱婆羅門等無量門。然皆顯示毗盧境界。此無量門。非卽念佛法耶。法華一經。從始至終。無非開示悟入佛知佛見。此非始終唯一念佛法門耶。楞嚴最初顯示藏性。明成佛之真因也。其次揀選圓通。示成佛之妙行也。後歷六十聖位。圓滿菩提。歸無所得。證佛地之極果也。昔此則成七趣沈淪。向此則明五魔擾亂。末後云有人身具四重。十波羅夷。瞬息卽經此方他方阿鼻地獄。乃至窮盡十方無間。靡不經歷。若能一念將此法門。於末劫中。開示未學。是人罪障。應念消滅。變其地獄所受苦因。爲安樂國。此則徹始徹終。唯一念佛法門也。總佛一代時教。三藏十二部。半滿權實。偏圓頓漸。種種法門。無非顯示唯心自性。圓成無上妙覺而已。得非總一大念佛法門耶。

一眞爲生死。發菩提心。是學道通途。二以深信。願持佛名。號爲淨土。正宗。三以攝心。

專注而念。爲下手方便。四以折伏現行煩惱。爲修心要務。五以堅持四重戒法。爲入道根本。六以種種苦行。爲修道助緣。七以一心不亂。爲淨行歸宿。八以種種靈瑞。爲往生驗證。此八種事。各宜痛講。修淨業者。不可不知矣。

衆生所以輪回者。六道也。餘趣衆生。爲驚瞋苦樂所障。無暇向道。可以整心慮。趨菩提。唯人道爲能耳。但失人身者。如大地土。得人身者。如爪上土。人身豈易得乎。人道衆生。從生至壯。以及老死。眼之所見。耳之所聞。無非世間塵勞生死業緣耳。佛法豈易聞乎。得人身已難。況得男子身。六根具足尤難。聞佛法已難。況聞彌陀名號。淨土法門尤難。何幸而得難得之人身。何幸而聞難聞之佛法。聞之而猶不肯信。不深爲可惜也哉。不信姑置。卽如信者。信而不願。猶不信也。願而無行。猶弗願也。行而不猛。猶弗行也。行之所以不猛。由願不切。願之所以不切。由信不眞。總之生眞信難。信果眞矣。願自能切。願果切矣。行自能猛。眞切信願。加以勇猛行力。決定得生淨土。決定得見彌陀。決定證三不退。決定一生補佛。旣得生淨土矣。曠大劫來。生死業根。則從

此永斷。既一生補佛矣。至極尊貴。無上妙覺。則便得圓成。此一念真信所關係者。豈淺淺哉。苟非障道緣薄。生死業輕。久種善根。宿因深厚者。何以能爾。然吾人無量劫來。業力輕重。善根深淺。皆莫得而知。但業力由心轉變。善根在人栽培。是故宏法者。不得不善巧方便。懇切開示。而學道者。不可不竭力奮勉。勇往直前。但一言入耳。一念動心。皆可轉變業力。皆能栽培善根。雖聞種種緊要開示。都無一言所入。雖遭種種逆順境界。曾無一念奮發。是爲真業力深重。真善根輕鮮。則亦莫可如何也矣。

現前一念心性。本與佛同體。佛已久悟。而我猶迷。佛雖已悟。亦無所增。我雖猶迷。亦無所減。佛雖無增。以順性故。受大法樂。我雖無減。以背性故。遭極重苦。佛於同體心性之中。雖受法樂。以同體大悲。無緣大慈。念念憶念於我。念念攝化於我。我於同體心性之中。雖遭衆苦。不知仰求於佛。不知憶念於佛。但唯逐境生心。循情造業。曠大劫來。五逆十惡。種種重業。何所不造。三途八難。種種大苦。何所不受。言之可慚。思之可怖。設今更不念佛。依舊埋頭造種種業。依舊從頭受種種苦。可不愧乎。可不懼乎。

今且知佛以大慈大悲。於念念中。憶念攝化於我。則我今者深感佛恩。故應念佛。一向長劫。枉受衆苦。欲求脫苦。故應念佛。已造之業。無可如何。未來之業。可更造乎。生慚愧心。故應念佛。同體心性。既曰本有。卽今豈無。祇欠悟證耳。求悟心性。故應念佛。以求悟心念佛。念佛必切。以慚愧心念佛。念佛必切。以畏苦心念佛。念佛必切。以感恩心念佛。念佛必切。我不念佛。佛尙念我。我今懇切念佛。佛必轉更念我矣。大勢至菩薩云。十方諸佛。憐念衆生。如母憶子。子若逃逝。雖憶何爲。若子憶母。如母憶時。母子歷生。不相違遠。若衆生心。憶佛念佛。現前當來。必定見佛。去佛不遠。不暇方便。自得心開。此大士親證實到境界。吐心吐膽相告語也。我今念佛。必得見佛。一得見佛。便脫衆苦。卽開悟有期。果得開悟。便可一痛洗已往之慚愧矣。佛尙可不念乎。

一切衆生本來是佛。真心本有。妄性元空。一切善法。性本自具。但以久隨迷染之緣。未斷元空之妄。未證本有之真。善本具而未修。佛本是而未成。今欲斷元空之妄。證本有之真。修本具之善。成本是之佛。而隨悟淨之緣者。求其直捷痛快。至頓至圓者。

無如持名念佛之一行矣。以能念之心。本是全真成妄。全妄卽真。所念之佛。亦本全德立名。全名卽德。能念心外。無別所念之佛。所念佛外。無別能念之心。能所兩忘。心佛一如。於念念中。圓伏圓斷。五住煩惱。圓轉圓滅。三雜染障。圓破五陰。圓超五濁。圓淨四土。圓念三身。圓修萬行。圓證本真。而圓成無上妙覺也。一念如是。念念皆然。但能念念相續。其伏斷修證。有不可得而思議者矣。以是全佛之心。念全心之佛。實有自心果佛。全分威德神力。冥熏加被耳。一句佛號。不雜異緣。十念功成。頓超多劫。於此不信。真同木石。捨此別修。非狂卽癡。復何言哉。復何言哉。

問。諸方皆有淨土。何專讚西方。求願往生耶。答。此非人師意也。乃金口誠言。分明指示故。大乘顯密諸經。同指歸故。令初心人專注一境。三昧易成故。四十八願爲緣。緣強故。十念爲因。因勝故。佛與衆生。偏有緣故。此土衆生。無論僧俗。男女老幼。善惡之人。當其處極順逆。苦樂境緣之時。多必由中而發。衝口而出。念佛一聲。然不念佛則已。凡念佛必念阿彌陀佛。此誰使之然。蓋衆生久蒙佛化。久受佛恩。與佛緣深故也。

且此彌陀一經。羅什最初譯成。東林遠祖。卽與一百二十三人。結社念佛。其一百二十三人。以次漸化。臨終皆留瑞應。雖鸚鵡八八兒念佛。化時皆有瑞相。此非衆生與佛緣深。謂之何哉。又無量壽經云。當來經道滅盡。我以願力。特留此經。更住百年。廣度含識。夫不留他經。而獨留此經者。豈非以此法門。下手易而攝機普。入道穩而獲益速耶。以是而知其時愈後。此法愈當機矣。

世間衆生。當處急難痛苦之時。嗥叫父母。呼天喚地。不知父母人天王等不能救我。生死盡我輪回。以其同在生死輪回故耳。三乘聖人。雖出生死。無大悲心。無益於我。諸菩薩等。雖有大慈悲心。以其心證各有分限。未能普利衆生。滿一切願。十方諸佛。雖皆證窮法界。然我感之不易。縱感極而見。不過暫時離苦。終非究竟。唯阿彌陀佛。但得一見。卽頓脫生死。永斷苦根矣。唯此一句阿彌陀佛。是所當盡心竭力者。予曾有偈云。世間出世思。惟徧不念彌陀。更念誰。然而念佛不難。難於堅久。果能堅持一念。如生鐵鑄成。渾鋼打就。如一人與萬人敵。千聖遮攔不住。萬牛挽不回頭。如是久

之。必能感通相應。若其未能如此用心。便謂佛言無驗。佛心難感者。夫豈可哉。但得一念感通。便頓出生死。直登不退。穩成佛果。豈易事也哉。

一切衆生。爲利鈍十使所使。久經長劫。流轉生死。受大苦惱。不能出離。可悲也。十使者。何卽身邊邪見戒。此五爲利使。以發動輕便故。貪瞋癡慢疑。此五爲鈍使。由利使所生。對利說鈍故。此之十使。衆生或多或少。各有偏重。若帶之修道。但唯增長邪見煩惱。決無相應分。如欲斷之實難。以此十使。於四諦下。歷三界九地。有八十八使見惑。八十一品思惑。但斷見惑。如斷四十里流。況思惑乎。若見思二惑。毫髮未盡。分段生死。不能出離。此所謂豎出三界也。甚難甚難。然此十使。總名衆生知見。古德謂衆生知見。須以佛知見治之。佛知見者。卽現前離念靈知也。然此靈知。不能孑然自立。必隨緣起。不隨佛界之緣。便隨九界緣起。離十界外無別緣起故。欲隨佛界緣起。無如以信願心持佛名號。但信貴深願貴切。持名貴專勤果。以深切專勤之心。信願持名。卽是以佛知見而爲知見。亦卽是念念中以佛知見治衆生知見也。熾然十使心。

中但置一信願持名之心。卽轉生界緣起。爲佛界緣起。此於修道門中。乃點鐵成金。極妙之法。只須赤體擔當。久久勿替。管取金臺。可以坐待寶蓮。不日來迎。是爲從此同居。生彼同居。橫出三界。較之豎出者。不亦省力也哉。

一句阿彌陀佛。是阿伽陀藥。無病不療。是如意珠王。無願不滿。是生死苦海之慈航。無苦不度。是無明長夜之慧燈。無暗不破。但得一歷耳根。便爲有緣。但能一念信心。便可相應。信心果真。願不期發而自發。只將此信願二法。常存在心。如忠臣之奉聖君。密旨。孝子之受慈父嚴命。憶念不忘。作爲第一件要事。不論所處境界。靜鬧閒忙。多念少念。總皆爲往生正因。只恐介在勤怠間耳。吾人曠大劫來。久在輪回。豈永不發。求出離之心。修向道之行耶。蓋皆廢於因循。敗於怠惰。所以常在生死。受大苦惱。今聞持名簡要法門。若仍循故轍。安於覆敗。可謂第一等無血性漢子矣。

所謂執持名號者。卽拳拳服膺之謂。謂牢持於心而不暫忘也。稍或一念間斷。則非執持也。稍或一念夾雜。則非執持也。念念相續。無雜無間。是真精進。精進不已。則漸

入一心不亂。圓成淨業。若到一心不亂。仍復精進不輟。將見開智慧。發辯才。得神通。成念佛三昧。以至種種靈異瑞相。皆現前矣。如蠟人向火。薄處先穿。但不可豫存期效之心。唯當致力於一心不亂耳。一心不亂。乃淨業之歸宿。淨土之大門。若未入此門。終非穩妥。學者可不勉哉。

修習一切法門。貴乎明宗得旨。今人但知萬法唯心。不知心唯萬法。但知心外無佛。不知佛外無心。但知無量爲一。不知一爲無量。但知轉山河大地歸自己。不知轉自己歸山河大地。然既不知心唯萬法。豈真知萬法唯心。既不知佛外無心。豈真知心外無佛。所謂一箇圓球。擘作兩半。離之則兩傷。合之則雙美也。是故念佛者。必以唯佛唯土爲宗。若唯佛唯土之宗不明。則真唯心義不成。果透真唯心義。則真佛唯土之宗自成。既成此宗。則一句所念之佛。所生之土。全體大用。橫徧豎窮。獨體全真。包羅無外。所念既爾。能念亦然。是謂以實相心。念實相佛。以法界心。念法界佛。念念絕待。念念圓融。以絕待故。全超一切法門。無與等者。以圓融故。全收一切法門。無出其

外者。此之謂法無定相。遇緣卽宗。繁興大用。舉必全真。一句阿彌陀佛。須恁麼信。恁麼念。方是不思議中。不思議也。

生佛不二。平等共有者。唯此現前離念靈知耳。諸佛以隨悟淨因緣。悟之又悟。淨之又淨。悟淨之極。故其靈知橫徧豎窮。廣大無外也。衆生以隨迷染因緣。迷之又迷。染之又染。故其靈知局然促然。介爾微劣也。然卽此介爾靈知。與諸佛廣大靈知。觀體不二。毫髮無差。使其得隨悟淨之緣。業盡情空。則此介爾之知。當下轉爲廣大無外之靈知矣。如一星之火。能燒萬頃荒田。然此現前一念靈知。若約所知之境。固有廣狹勝劣之不同。若約能知之知。則全體無異。如同一火也。燒檀則香。燒糞則臭。所燒雖殊。能燒之火無二。又如同一水也。清臭不同。同一鏡也。昏明有異。清濁雖殊。溼性不二。昏明雖異。光體是同。水同一溼也。濁者可使澄之而清。鏡同一光也。昏者可使磨之而明。光昏者爲帶垢耳。垢非光。光者鏡之本體也。水濁者爲雜塵耳。塵非溼。溼者水之本性也。此一念靈知。如水之溼。如鏡之光。如火之燒。舉體無異者也。唯其舉

體無異。故於修道方便門中。便有多門。有但仰慕諸聖者。有但尊重已靈者。有外慕諸聖內重已靈者。有不慕諸聖不重已靈者。若但仰慕諸聖者。如本分念佛之人。以知諸聖皆已先證我之已靈。語默動靜。皆堪垂範。我曹若不仰慕諸聖。則進修無路矣。故或專持名號。或觀想音容。三業虔誠。六時敬禮。傾心歸命。盡報遵承。及乎時至緣熟。感應道交。心地大開。靈光獨露。乃知我之已靈。原與諸聖平等無異。亦不可不自尊重也。又但尊重已靈者。如宗門參禪者。以直指人心。見性成佛。故唯欲十二時中。四威儀內。獨露當人面目。受用本地風光。離心性外。毫無取著。所謂任他千聖現。我有天真佛也。及乎造詣功深。悟證已極。乃知一切諸聖。皆久已先證我之已靈者。尤不可不仰慕也。又外慕諸聖內重已靈者。夫欲尊重已靈。必須仰慕諸聖。唯其仰慕諸聖。正是尊重已靈。又仰慕諸聖。必須尊重已靈。若不尊重已靈。豈能仰慕諸聖。此則內外交修。心佛等重。既無偏執。進道彌速。至於力極功純。全體相應。乃知諸聖。但不過先證我之已靈而已。無庸仰慕。而我已靈者。亦不過平等齊於諸聖而已。何

勞尊重。又不慕諸聖。不重己靈者。此謂寸絲一掛。心佛兩忘。徹底撒開。迴無依倚。外遺世界。內脫身心。一念不生。萬緣坐斷。至於久久功熟。圓滿證入。本靈獨露。諸聖頓齊。雖不仰慕諸聖。乃善仰慕。雖不尊重己靈。卻真尊重。此之四路。學者自諒根性。各隨好樂。但當一門深入。久之必皆有相應。切不可妄生執著。輕發議論。出奴入主。是一非餘。不唯背妙道而成障礙。將恐謗大法而招愆尤也矣。

楞伽經云。諸聖所知。轉相傳授。妄想無性。二祖云。覓心了不可得。起信論云。若有能觀無念者。卽爲向佛智故。華嚴合論云。頓悟一念。緣起無生。超彼三乘權學等見。此佛經祖語。菩薩知識造論。皆就現前一念指點。顯妄性本空也。夫妄本空而真本有。非佛而何。但衆生久隨汙染之緣。未能頓復其本空耳。須以清淨緣起。漸而轉之。以吾卽佛之因心。念吾卽心之果佛。因果從來交徹。心佛法爾一如。而吾卽心之果佛。無緣大慈。同體大悲。本自不可思議。且吾卽佛之因心。深信切願。專懇持名。亦復不可思議。能於念念中。齊澄衆染。圓顯本空。頓契靈源。直趣果海。然則清淨之緣。無過

此者。但於念時。當萬緣放下。一念單提。如救頭然。如喪考妣。如雞抱卵。如龍養珠。不期小效。不求速成。但只一心常恁麼念。是名無上深妙禪門。此則根身世界。密隨其心。念念轉變。殆非凡心肉眼所能知見者也。及乎報終命盡。彌陀聖衆。忽現在前。或現異香天樂。諸靈瑞相。世人方謂淨業成就。然淨業之成。豈此時乎。

念佛當生四種心。云何爲四。(一)無始以來造業至此。當生慚愧心。(二)得聞此法門。當生忻慶心。(三)無始業障。此法難遭難遇。當生悲痛心。(四)佛如是慈悲。當生感激心。此四種心中。有一淨業。卽能成就。念佛當長久。不可間斷。間斷淨業亦不能有成。門久當勇猛。不可疲怠。疲怠淨業亦不能成。長久不勇猛。卽有退勇。猛不長久。卽無進。

當念佛時。不可有別想。無有別想。卽是止。當念佛時。須了了分明。能了了分明。卽是觀。一念中止。觀其足。非別有止觀。止卽定。定卽止。果觀卽慧。因慧卽觀。果一念不生。了了分明。卽寂。而照了了分明。一念不生。卽照。而寂。能如是者。淨業必無不成。如

此成者。皆是上品。一人乃至百千萬億人。如是修。皆如是成就。念佛者可不慎乎。

蚯蚓蟲蛇。人所不食者也。豈見充滿於天下。況世間禽獸之類。正因殺禽獸者多耳。怨怨相報。互爲畜生相報。故而若人人戒殺。則物類業報漸銷。楚不捕蛙而蛙反少。蜀不食蟹而蟹自稀。故世尊告大慧菩薩云。有無量因緣。不應食肉。一切衆生。展轉常爲六親。以親想故。不應食肉。臭穢不淨。不應食肉。諸天厭棄故。不應食肉。令口氣臭故。多惡夢故。不應食肉。入於空間林中。虎狼聞香故。不應食肉。聽食肉者。無有是處云云。不但一切衆生肉。皆不可食。且五種辛菜。亦不可食。一、爲其辛臭故。二、能障菩薩故。三、諸天厭極故。四、熟食助淫。生食發恚故。五、邪魔餓鬼。聞氣常舐其唇故。所以放生必然長壽。多殺必然夭亡也。

千百年來椀裏羹。

冤仇似海恨難平。

欲知世上刀兵劫。

且聽屠門夜半聲。

靈芝觀經疏曰。有人發願願未得道前。所生之處。值佛聞法童真出家。今謂若生淨土。則任運值佛爲僧。只由不知淨土。故有此願。禪講宗師。率多此見。嘗試語曰。汝今已得男子爲僧。只合便求出離。何乃復求男子。再願出家。略無勝進乎。

2
121543

大集經說

『末法億億人修行罕一得道。唯依念佛得度生死。』

潘顯貽敬贈



2

321543

2

321543